

## *ASO LUA, 1 FEPUARI 2022*

*Na nofoia e le Fofoga Fetalai le Nofoa i le itula e 9:33 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

I le tulaga aloaia, ou te faatalofa atu ai i le paia o le Palemene i leni taeao fou, i le afio o lau Afioga i le Palemia, afio foi lau Afioga i le Sui Palemia, le afifio o a outou Afioga i Minisita o le Kapeneta, e faapea foi Afioga i Minisita Lagolago.

Afio lau Afioga i le Sui Taitai, aemaise foi le mamalu o lea Itu o le Maota ma sui usufono uma o le Maota, i lo outou soifua manuia ma le lagi e mama. Tatou te taufai faafetaia le alofa o lo tatou Tapaau Sili ina ua mafai ona tatou toe fesilafai i le manuia mo le faaauauina o le tatou galuega.

Ua tatou i ai foi i le uluai aso o leni masina, o le Atua lava o lo o tautai i la tatou folauga. E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo, malo le onosai mai ma lagolagoina tatou taulumaga. Malo le soifua manuia i leni taeao.

Samoa i ou tulaga faalupelupeina i lau faafofoga tapuai mai, e talitonu lava le taofi, o lo o tumau pea le agalelei o le Atua i si o tatou atunuu, i le maleifua mai i faguga lelei i leni aso fou, malo le soifua manuia ma le lagi e mama.

Ae tatou te le i alo atu mo le tatou galuega o leni aso, e fia oo lava se upu a le Nofoa e tusa o le aso ananafi ma le faaiuga na tuueseina ai le sui usufono mamalu mo Faleata 3. E lagona le faanoanoa i lafoga a le sui usufono mamalu na lafo mai i le Fofoga Fetalai i luma o le Palemene i le aso ananafi. E pei ona ou tulai atu i le taimi o tatou taulumaga, ia tausisia le filemu le mamalu ma le aloaia o le Fono tu maualuga a le atunuu. Peitai, e leai se gaulofa ae na o le gaumatau. E leai se agaga o le Nofoa tatou te oo i ni tulaga e pei ona i ai ananafi. Peitai, e ao ona ou amanaia le tausiga o le mamalu o le Palemene. E ui i lafoga le faaaloalo a le Afioga i le sui usufono mamalu na lalafa mai ananafi, ou te manatu tele i le tapuaiga a tupu ma ee o le itumalo o Faleata 3 o lo o taputapuai mai. Ua saunoa foi le Maota ananafi, o le lagona foi lena o le Nofoa. Peitai, e ao lava ona uia ala e mamalu ai le Palemene.

Le paia e o le Maota i leni taeao, ua ou maua le loto faamagalalo ona o lou ava atu i le Fonousu a le atunuu aemaise o le tapuaiga mamalu a le atunuu o

lo o silasila mai ma faafofoga mai. Tatou alo i luma lo tatou vaa. Na o le pau lena o le ala e iloa ai le filemu.

Ou te toe fautua atu foi i le tatou Maota, tatou tausisia a tatou Tulafono Tumau e sologa lelei ai a tatou taualumaga ma mamalu ai lo tatou valaauina. Ia manuia tele le usugafono a le Palemene i lenei taeao, ia manuia foi le tapuaiga a le atunuu o lo o faafogafoga mai.

**Tofa Lealailepule Rimoni Aiafi (Faleata 3):** Lau Afioga i le Fofoga Fetalai...

**FOFOGA FETALAI:** Ia, tulai mai lau Afioga i le sui usufono mamalu mo Faleata 3.

**Tofa Lealailepule Rimoni Aiafi:** Ia, e talitonu o lea ua e sii le faafetai ma le viiga i le Atua i lenei taeao fou ua tatou toe faatasi ai ma potu le mamalu ma le paia o lenei Fonousu a Samoa aua le galuega e fia faatino aua si o tatou atunuu. Ae le fia nofonofo fua foi i lenei aso, e nofo atu fua a o au o Ae. Ia, e muamua ona avatu le faamaluluga ma le faatoesega foi i lau Afioga i le aso foi ananafi. E pei lava foi ona faateia foi i le tulaga na i ai, o le ala lea. Ae mamao ia te au se tulaga o se faapea i lau Afioga. E faamalulu atu ai, ia malu ave, fale i le Atua lou finagalo, o oe o le Alo o le Malietoa, o le Aloalii. O Malietoa na ola ai Samoa i le kerisiano, ia alofagia faagalo ia fatia i le aso ananafi. Tatou alo i luma e pei ona e saunoa.

E faamalulu atu foi, e leai, e ava tele i le Nofoa, lena e te silafia, e 10 tausaga o tatou i le Itu Agai, ua leva le ta mafutaga. E sili atu le leva o le ta mafutaga i le toatele o lenei Palemene, e le i tulia lava au i fafo, o le taimi muamua lea. O le ala lea o le faateia ananafi ae ui i lea lau Afioga, faamagalo mai le sui usufono o Faleata 3, faamagalo mai foi e le Palemene.

E faamalulu atu foi i le Palemene ma le faafofogaaga a Samoa, e pei ona e saunoa tatou agai i luma. E leai, e leai se mea, e faamalulu atu i lau Afioga. O lea lava ou te talitonu, e le o se finagalo o lau Afioga, o le lafo na faatu atu. Ae ui i lea, lafo ia i nuu le aina ma i latou na faaosoina lea lafo a ua maua foi i le loto faamagalo.

E faamalulu atu i lau Afioga, ia manuia le Fonousu a Samoa ma le faafofoga mai a Samoa, faamagalo foi se leo o lenei usugafono. Ma le faaaloalo lava. Faafetai.

**FOFOGA FETALAI:** Malo faafetai mo le saunoaga matagofie a lau Afioga i le sui usufono mamalu. Ia, o le tulaga lena lau Afioga i le sui usufono, e le i ai foi se tu a le Nofoa a mea o le a tatou oo i le tulaga faapena, ae pei lava ona faailoa atu, o le taua lava ia tatou maua le fealofani ma tatou galulue faatasi o lo o faafogafoga tapuai lo tatou atunuu. Ae faafetai o lea ua lagona foi e lau Afioga i le sui usufono mamalu, ia tatou faapena ona fai.

Tatou faamoemoe pea i le Atua o le a fesoasoani mai aua le faagasologa o le tatou galuega.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2021/2022 – felafolafoaiga faaaau  
i luga o le faitauga faalua – Aso 6**

**FOFOGA FETALAI:** E tolopo Galuega a le Fono Aoao i le po anapo ua maea ona saunoa le Afioga i le Minisita o Galuega, Felauaiga ma Atinae Eseese.

Ia, ou te talitonu o lenei taeao fou, ua oo atu le faasologa i lau Afioga i le Minisita o Pisinisi, Alamanuia ma Leipa. Ia, tulai maia lau Afioga i le Minisita.

**Tofa Hon LEATINUU WAYNE SOOIALO (Minisita mo Pisinisi, Alamanuia ma Leipa):** E momoli atu le faafetai tele i lau Afioga i le Fofoga Fetalai mo lenei avanoa taua ua maua i lenei taeao. Ua e tuu maia leni avanoa o le taeao paia, aua ua uma ona e toto le niu i le tatou vatapuia ma le Atua i leni aso, o lea foi ua uma ona e momoli a tatou talosaga i le tatou Tama i le lagi aemaise foi faatoesega, aemaise foi faamagaloga i leni aso, ia o lea ua faamagaloga atu ai ma le uso, le sui usufono, o se tasi o sui usufono o leni itumalo o Faleata. Faafetai mo lou agaga faamagaloga.

Ou te tulai i le ava tele ma le faaaloalo se i tau fai atu se auaunaga a leni Vaega Tumaoti, Matagaluega a le Malo aemaise foi Matagaluega Tumaoti a le Malo o i lalo o le vaavaaiga a le Minisita i leni vaitaimi, aua foi le Tala Faaopopo o le Tupe ua opea i le Maota, ua felafolafoai ai i leni taeao.

Ou te faatulou atu i lau Afioga i le Fofoga Fetalai, aemaise lau Afioga foi i le Palemia i leni taeao. Afio foi lau Afioga i le Sui Palemia, afifio le Kapeneta nei, afifio foi Minisita Lagolago o Matagaluega taitasi, ia aemaise le afio foi o le Taitai o lena Itu, e ui lava tatou te le o mafuta, ae talitonu le agaga o lo o tapuai mai lava aua le usugafono.

E faatalofa atu foi i lau Afioga i le Sui Taitaifono po o le sui o lena Itu aemaise le mamalu i sui usufono o itumalo taitasi filifilia, aua foi le Fonousu a Samoa i leni aso.

E momoli le faafetai i saunoaga uma, aemaise foi tuualalo, fautuaga aemaise foi ni manatu faaalua, mai le mamalu o le tatou Palemene e toe faufau ai foi lo tatou vaa aua foi le agai i luma o le tatou galuega fai. E faafetai ona e le toatele tele i latou na afea leni Matagaluega po o leni foi Sector. O lona uiga, o lo o i ai lava galuega ia lelei ona faatino.

Ae peitai, ua ou filifilia ni mataupu e sili ona ogaoga sa tatalo mai ai foi le mamalu o le tatou Palemene, ia, e fia maua ai foi se manatu aemaise foi ni faafesili ina mafai ona malamalama atili ai le tatou Palemene. E le toatele ni

sui usufono sa afea ma faafesili foi i le tulaga o lenei Sector po o lenei foi Vaega Tumaoti. Ae talitonu le agaga, ia e ao lava ona tali atu ona o le taua foi o ia faafesili, aua foi le faafofoga mai o si o tatou atunuu, aemaise foi le fia malamalama ai o le tatou Palemene.

Masalo o le a ou amata atu i le vaega lea o le tau o oloa po o le Price Control Board. Sa toatele i latou sa fesiligia le tulaga lea i le Price Control Board. O lea ua uma ona faamalamalama e nisi o sui usufono le tulaga e i ai le tulaga lea. Ae ao ona ou amata atu e faapea, mo le silafia e lenei Palemene mamalu, i le tulaga o lo o i ai nei le feaveaiga o tatou uta mai Niu Sila ma Ausetalia agai i Samoa, i le 2 tausaga talu ai, ua siitia i luga i le 44% le tau o le faamomoli po o le tau o le freight mai Niu Sila i Samoa nei. Ae pe 64% le siitia o le freight po o faamomoli mai Ausetalia i Samoa nei. O lona uiga, o ata ia o le tulaga lea uai ai nei le soifuaga i le tulaga o tau o oloa. A siitia loa tulaga ia e i ai lava le agaga o le a siitia foi le tau o le soifuaga i nei i Samoa. Ae peitai, sa fesiligia e nisi le tulaga i le tatou Price Control Board po o fea o i ai, po o i ai lava le tatou Price Control Board. Ae ao ona ou faamalamalamaina atu e faapea; o le Price Control Board na aveeseina mai ia Iulai i le 2017 ina ua suia le Tulafono i faiga faatauvaga, fefaatauaiga ma le puipuiga o tagata e faaaogaina oloa, auaunaga, ma ua sui e le Competition and Consumer Commission. O lea la ua i ai le Competiton and Consumer Commission, o lo o i ai i latou e toatolu, o lo o i ai i totonu o le Komiti lea. Talu ona amata mai i le amataga o le tausaga 2020 puipuiga o le Koviti-19 ma faalavelave faafuasei, na toe faaaogaina ai le Price Control Board i lalo o le aiaiga o le Faavae. O lona uiga, o lea lava e i ai le tatou Price Control Board i totonu o Samoa i le taimi lenei aemaise le Matagaluega.

O ia la tulaga, o lea ua i ai le agaga o le Matagaluega e toe tilotilo lelei i le faatinoina o le aiaia o tulaga o le tau o le soifuaga aemaise tau o oloa. Ae peitai e pei ona saunoa nisi o sui usufono, e le aafia uma ai le tele o oloa. E pei ona silafia, e na o oloa e tai pei o suka, masima, araisa, falaoamata ma tulaga faapena, e oo i meaai aisa e pei o moa, mamoe ma tulaga faapena. O lona uiga, e le aafia atoa ai la le tele o oloa i le tulaga lea. A o lea ua taumafai le tatou Matagaluega ina ia toe tilotilo totoa ma fai ni asiasiga ina ia mafai ai ona faasao. E le gata ina faasao, a ia avea foi i latou o lo o solitulafono pea i le suiga o tau o oloa ina ia fai i ai se fuafuaga aua foi le agai i luma. O le tulaga lena o lo o i ai i le taimi lenei. Ae le gata i lea, sa masani ona, a sau le vaa mai Niu Sila, pe na o le 14 aso e sau ai, a o lenei vaitaimi, o lea ua toetiiti lava masina atoa faatoa taunuu mai le vaa ona toe foi lea toe sau foi lea i le isi masina atoa. O lea la ua mafua ai ona tau le maua ma sioki ai a tatou meatausami, ae le gata foi i lea, o le tele foi o isi mea e manaomia, e pei ua sioki talu ai le tulaga lea. A o le sau mai Ausetalia, toetiiti lava 2 masina le taimi ua omai ai a tatou vaa. O lona uiga, e le o mafai ona tatou control ina atu i nei le tulaga lea i le femalagaaiga o vaa.

E le gata i lea, o lo o i ai foi le tatou vaalele lea e masani ona sau i vaiaso uma e aumai le tatou cargo ae se paga, o lea ua taofi mo le taimi lenei ona o tulaga le maalofia ona o le faamai. E pei ona outou silafia, o lea ua faanofoesea le aufaigaluega a le Samoa Airways e toa-42 i latou. E le gata i lea, a o le aufaigaluega foi a le malae vaalele, e le gata i le falemai, o le quarantine, o le customs, ua le mafai ai ona maua nisi latou te faatinoina le galuega lea. E le afaina la Matagaluega a le Malo, ae pei lava o le handling agent lea a le Samoa Airways, o i latou ia ua uma ona certify e handle le vaalele lea a le Air New Zealand. O lea la ua i ai le fuafuaga a le Air New Zealand e sili ai pe a aua ne i faataunuuna flights ia e omai Aso Toonai e aumai le tatou cargo. Ia o le mafuaaga lea ua ala ai ona le faataunuuna.

Ia, e tatalo atu ai foi i le Afioga i le Minisita, pe le ono toe tilotilo le tatou faigamalo, toe foi tatou i se tatou vaa container, lea sa i ai le tatou Forum Samoa i lenei vaiaso, a o lea ua le toe i ai se vaa, tasi lea tulaga pe mafai ona tatou tilotilo i ai, toe aumai se tatou vaa o la e i ai le PFL ma le SSS, o i latou ia, e mafai ona...

**Tofa Hon Laufo Fonotoe Nuafesili Pierre Laufo (Anoamaa 2):** Lau Afioga i le Fofoga Fetalai, ou te tulai atu ma le faaloalo...

**FOFOGA FETALAI:** Ia, malie lau Afioga i le Minisita, se i tulai mai lau Afioga i le Sui Taitai o le Itu Agai.

**Tofa Hon Laufo Fonotoe Nuafesili Pierre Laufo:** E te silafia foi a saunoa loa le Malo, ia e augata lava e faalavelave. Peitai, o lea ua see mamao ese ma le Price Control Board foi lea sa ou taua, ona ou manatu lea, e momoli atu le faafetai ma le faamalo i lau Afioga, ona o lea ua maua le Komiti lea sa taua e lau Afioga, a o lea ua i ai. O la e ua i ai, ua uma foi ona filifilia ma tofia i ai sui i le Komiti, le Competition and Consumer Protection Commission. Ia ae manatua foi la o le tulaga lenei, e pei e ese lava le komisi lenei ia i le tulaga foi lea o le faiga lea na sui ai le tatou faiga faavae o open competitions, a o le Price Control la lea ua e toe saunoa o lea ua toe faaoga, aua o lea e matau atu o le aso 23 ea o Tesema lea na aumai ai le latou price order muamua, price list. Ia manatua foi la e ese foi le Board lenei, le Price Control Board lenei, o latou e set ina mea o tau o oloa, e pei ona e saunoa foi ma taumafai atu i ai se manatu ma se lagona i mea o oloa ia faapea. Aua e taua le tulaga pei ona e taua, lea foi e aafia, e aafia i mea o femalagaiga o vaa tau o oloa nei. E sao o lea foi sa laga i saunoaga a sui usufono mamalu. Aua manatua foi e o faatasi lava le tatou vaega foi lea o le atiaeina o pisinisi nei, le tatou tamaoiga, ia faapea foi le tulaga o le atiaeina o tatou afioga i aiga taitasi. O lona uiga o le social development ma le economic development pei e o faatasi lava, e o vaavaalua lava le lua lenei, a lelei lava

foi le tamaoaiga, ua siitia foi ma lelei le tulaga o le soifuaga lautele o tagata lautele.

Ae pei o le tulaga lea sa laga atu e isi sui usufono po o silasila i ai lau Afioga, i le vaega foi lea ona e pei e le o aofia ai oloa foi nei faufale, aua tasi lena vaega lea sa laga e nisi o sui usufono i le taugata o sima ma isi mau oloa faufale faapena, aemaise oloa e faaaoga i le fausiaina o atinae tetele a lo tatou Malo ma le atunuu.

Ia pei o le tulaga lena foi lea e fesiligia ai lau Afioga faamolemole, po o silasila foi i lena itu, ia se aso ma se taimi ona aumai lea po o le a se tulaga o i ai lea vaega. Ma le faaaloalo.

**FOFOGA FETALAI:** Malo faafetai i lau Afioga i le Sui Taitai o le Itu Agai. Tulai mai lau Afioga i le Minisita.

**Tofa Hon LEATINUU WAYNE SOOIALO:** Faafetai lava i le Afioga foi i le Sui Taitai o le Itu Agai po o le fesoasoani mai foi i le mataupu lea o lena e saolele lava lau saunoaga. Ae silasila foi lau Afioga, o lo o galulue faatasi le Komiti lea ma le Matagaluega, ona o le Komiti, e ese mai lava le Komiti ia ua uma ona faavae e fesoasoani i le Matagaluega aua le faatinoina o galuega ia. O lo o i ai foi le vaega faapitoa i le Matagaluega o lo o latou iloilo ina tulaga ia ma fai asiasiga. Aua a silasila foi lau Afioga, o le tau o le oloa e fua i luga o le taimi e taunuu ai i le uafu, e base la i luga o invoices ma mea faapena, o lo o fua i ai le tau o le oloa e fai ai agai i le tiute. O i ina la o lo o fai agai i ai le asiasiga a le Matagaluega, ina ia aua ne i i ai se siitaga e ese mai ai ma siitaga ua uma ona faatulafonoina. Ae le gata i lea, e i ai foi le talosaga i le Ofisa o Tiute ina ia toe tilotilo i le tariff o le Ofisa o Tiute pe leai sina fesoasoani mai i le tulaga lea, aemaise lenei vaitaimi. Ia, o lo o i ai foi le Minisita o le Ofisa o Tiute e tilotilo i ai i le tulaga lea. Ae o le galuega lava ia a le Matagaluega, o le siaki, suesue, ma vaai po o lelei ma talafeagai i le tulaga lea e fua i luga o invoices nei na aumai mai fafo lea ua ala ai ona faatulaga le tau o oloa ia o lo o faatino i inei. E ese mai ai la i oloa ia ua uma ona faataatiaese e lo tatou Malo, e leai e le aofia ai la i le tulaga lea e tai pei o meaai ma tulaga faapena.

Ia o le tulaga lena e fia fesoasoani atu i ai, a o lo o i ai lava le tatou Price Control Board, o lea o le a faatino ma toe tilotilo i ai, aemaise la le vaitaimi lenei o le Koviti-19 ona ua toatele foi ua faaaoga e nisi faipisinisi nei ma le sioki o tatou oloa ma le tuai o tatou vaa ma le siitia o le tau o le freight e avea ma mea e siitia ai i luga le tulaga lea o le tau o oloa. Ae silasila foi le tatou Palemene, ia e i ai lava foi kamupani ma oloa ma tulaga faapena o lo o i ai lava le amio lea e tataua lava ona kami mai tua ina ia mafai ona maximize le profit ma tulaga faapena. Ia o le tulaga lena o lo o tilotilo i ai le tatou Matagaluega. E le o nofonono le tatou Matagaluega o lea ua amata ona

taamilomilo ma amata foi ona fai moliaga pe a faapea o i ai se tulaga i le tulaga lea.

Ia, lau Afioga i le Fofoga Fetalai...

**Afioga Hon Fiamē Naomi Mataafa (Palemia):** Lau Afioga i le Fofoga Fetalai...

**FOFOGA FETALAI:** Se i tulai mai lau Afioga i le Palemia.

**Afioga Hon Fiamē Naomi Mataafa:** O lea ua ou matau atu ua faaiuiu le saunoaga a le Minisita i le tulaga lea o le Price Control Board. E fia fesoasoani i le mataupu tatou te mafaufau faatasi i ai. O le saunoaga, o lo o autu lava i fesili foi o lo o aumai i le siisii o le tau o oloa. Ia o lea ua faapea mai o nisi o mafuaaga o le tau o felauaiga. Na ona ou fia faapea atu lau Afioga i le Fofoga Fealai ma le mamalu o le Maota, o le mataupu o le siitia o felauaiga, o se mataupu ua feagai ma le lalolagi atoa, e le na o Samoa. Ma ua i ai foi se vaaiga i isi faigamalo po o le a se fofo, aua o lea lava ua mautinoa ma molimauina, le mea foi lea ua tupu ia tatou ua sii le tau o oloa. Ia, e i ai lava itu pei ona saunoa foi i ai le Minisita, o avanoa foi ia e faaogaina e tatou pisinisi e saili ai foi le polofiti.

Ae o le mataupu lava ia i le isi tulaga lautele atu, o le tau o felauaiga. Ma ou te iloa ua amata ona fai suesuega ma fautuaina foi faiga faavae a le Malo i le Sector lea, transport ma le freighting. Ona e ese le tele o le aafia o le tamaoaga ma le felauaiga o oloa i le taamilosaga i le lalolagi, pe a faapea o le a siitia lava. Ae i ai foi tua atu o lena mataupu o lo o fesiligia, po ua i ai se mea ua tupu i le Sector o lo o gaosia oloa, the supply chain pe i ai se mea ua tupu i ina, o aafiaga uma lava nei o le Koviti-19 i le tamaoaga ma vaega eseese o lo o gaosi ai le tamaoaga. O lea foi la e mataituina e lo tatou Malo i talanoaga ia ua amata ona fai i le fai silasila o faigamalo i faiga faavae i le Sector lea po o amiotonu le faiga, pe ua faaogaina foi le mea ua tupu i le lalolagi e tuliloa ai foi si o latou manuia, ae e ese le moomia mo le lalolagi atoa le lelei o le fefaatauaiga e ala i luga o tatou freights ma le avanoa o tatou vaa, o lea foi ua saunoa mai le Minisita i le tulaga lea ua fai lava sina tuai o le link lea a tatou ma Ausetalia, e le o toe i ai ni tatou vaa tuusao e o i Ausetalia.

A o mea uma lava ia, e fai faaiuga a i latou e ou pisinisi, o felauaiga, ma e tatau foi ona mataituina lelei e faigamalo mai lea taimi i lea taimi, a o lea lava o lo o fai le galuega mo le lotoifale ona ua feagai lava tatou ma le tau o oloa, ua siitia ma ua faaogaina ai le avanoa o lo o i ai a tatou Tulafono o le Price Control Board.

Ia na o se fesoasoani atu i le tatou mataupu.

**FOFOGA FETALAI:** Malo faafetai, malo saunoa i lau Afioga i le Palemia. Atonu o lea foi ua... Ia, saunoa mai lau Afioga i le Minisita.

**Tofa Hon LEATINUU WAYNE SOOIALO:** Ia, e momoli atu le faafetai i le Afioga i le Palemia mo le fesoasoani mai foi i le mataupu. E saolele lava, o aotelega ia o le faafitauli o lo o tatou i ai i lenei vaitaimi.

Ona ou see mai lea i le tulaga lea i galuega faavaitaimi. E toatele i latou sa fesiligia i le tulaga ua oo i ai le tatou galuega faavaitaimi. Mo le silafia e le mamalu o lenei Palemene, ua ova ma le 5,000 tagata o si o tatou atunuu o lo o i fafo i galuega faavaitaimi, ua ova atu ma le 3,000 i Ausetalia, ae pe 2,000 i Niu Sila. A tagai foi la le tatou Palemene ma le mamalu o le tatou atunuu i le tulaga ua i ai, so o se mea lava e toatele i ai nisi e o ese atu ma le atunuu lenei ma faapotopoto i ai, e i ai foi ona faafitauli, ae tele foi ona tulaga lelei o i ai ona o le tamaoaiga o lo o mafai ona lafo mai i totonu o Samoa. E le gata i lea aemaise foi faamanuiaga mo aiga taitasi. E lelei le polokalame, o polokalame lava ia i le amataga sa lelei ma tulaga faapena.

Ae fia tau atu le mea lenei, ina ua fai se tasi o faatalanoaga i luga o le leitia, ae oso ifo ai se sui i fafo i galuega faavaitaimi, ua valaau i ai le leitia sa fai ai le faatalanoaga, ina ia maua se avanoa, e mafai ona saunoa mai ai. O lana faamatalaga, lau afioga i le Minisita, o lea e oo mai i nei, e ova atu ma le 20 faiaoga o lo o matou omai i le galuega faavaitaimi. O lona uiga, o lea e i ai ma le isi faafitauli lea e i ai i i.

E pei ona silafia e le tatou Palemene, o lea e i ai le sioki o tatou faiaoga, a o lea e tilotilo atu, o lea ua oo i galuega faavaitaimi. O lea e tilotilo le tatou Matagaluega, po o fea e alu atu ai le afaina lea. Ua ala ona ou taua tulaga ia, o le isi tulaga lea, o lea ua amata ai ona maua faafitauli.

O le agaga lava ia o le polokalame mai le amataga, na o i latou e faimalaga e le faigaluega, ae ia i ai le poto masani. Ae peitai, a oo ina omai e faatumu a latou pepa e o i galuega faavaitaimi, ua le faaalua ai o latou e faigaluega, ma o latou o lo o faafaigaluega i nei i Samoa. Ua i ai la ma le isi tulaga ua tulai mai, ua leai ai ma ni tatou tagata faigaluega e tautuaina lo tatou business community po o le aufaipisinisi. Ae le gata foi i lea, o lea ua leai atu ai ma ni aumaga o nuu ma alalafaga, o lea ua o uma i galuega vaitaimi. O lea ua amata ona toe tilotilo le tatou Faigamalo i le taimi lenei, e tataua ona toe review, toe tilotilo i ai po o le a le mafuaaga ua mafua ai le tulaga lenei. E le gata foi i lea, o lona ua outou silafia, e i ai foi na i social problems o lo o i ai. Ua taunuu atu i latou i o, ua leva ona nonofo valavala ma le aiga, ua i ai la ma isi tulaga faapena. O lona uiga, e tele ona faafitauli ua tulai mai. Ae o lea o le a toe faaopoopo le isi liaison officer, po o i latou lea sa saunoa mai ai le sui usufono o Satupaitea i le tulaga lea, pe le tataua ona toe faaopoopo se isi tagata, e fesoatai ma le tatou aufaigaluega i Ausetalia.

O lea la ua i ai le agaga ua fesoasoani mai le Malo o Ausetalia latou te faatupeina, ia lea tagata po o le liaison officer lea mo le tausaga atoa. A uma



loa ona toe tuu mai lea i le tatou Faigamalo, e faatinoina lea faamoemoe. Ae peitai, a 2 la liaison officers ae 3,000 tagata o lo o i Ausetalia, e i ai lava faafitauli. Ona o Ausetalia atoa o lo o i ai, e uma le faafitauli i Melbourne ae tulai mai le faafitauli i Brisbane, ona lele mai lea e alu faapenei. O lona uiga e tatau ona tilotilo le Matagaluega i tulaga e tatau ona toe Iloilo lelei ai.

O lo o fai orientations, o lo o fai lelei ia tulaga e feiloai ai ma tagata ia e o i fafo. E pei ona ou fai atu, o i latou ia o lo o i fafo, o le taimi e o ese atu ai i Samoa, e toe lava o ni apaau agelu, i le taimi e fai ai tala ina ia maua le avanoa e alu ai i fafo, e ese le lelei. Ou te le inupia, o au ou te alu i le lotu, o au ou te a ma a, e na o mea lelei uma lava e lau mai. Ae peitai a taunuu loa i Ausetalia po o Niu Sila, ua matua sui atoa le tagata. O le natura lava lea o tatou Samoa i tulaga faapea, e le mafai ona tatou taumafai e faamaopopo uma. E amata mai lava i lona siosiomaga i le mea na amata ai ona sau.

Ona afifio lea i Ausetalia o lelei atoatoa, ua uma foi ona faatino a latou konekarate i le taimi na amata ai ona o ese atu ai i Samoa, saina ua malilie. O le totogi lea e totogi ai, o le mea lea e te entitle i ai, o mea uma ia o le a faatino, saina uma ma lelei. E taunuu loa i Ausetalia, tilotilo i le matautia ma le lelei ma le tele o le tamaoaiga, te i lava ua toe suisui malie. E le gata i le suisui malie, a ua talanoa ma nisi o aiga i Ausetalia, ua toe faaopopo ifo i ai i le tulaga o lo o i ai. E le o lelei ia le tulaga i le galuega. Ae peitai o Ausetalia, o le isi lea atunuu lea i le lalolagi, o le matuai lelei lava i le vaavaaia o le welfare o tagata faigaluega. E tutusa lelei le faatinoina o ia auaunaga i o tatou tagata faapea foi ma i latou i Ausetalia. O lea la ua i ai le fuafuaga, ina ua cancel le tatou flight lea na tuu e alu i le Aso Toonai. Na fuafua e 2 faigamalaga ia Ianuari, 2 faigamalaga ia Fepuari, 2 faigamalaga ia Mati, aua a tatou galuega faavaitaimi. A o lea ua i ai le fuafuaga a lo tatou Faigamalo i lenei vaitaimi, o lea foi ua tele le Koviti-19, e le gata i lea, a e o lo o i ai na i tulaga ia i latou o lo o aafia ai i o. O lea e pei ona outou silafia, ua i ai foi nisi ua maliliu mai o, o le finagalo lava o le Atua. Ae vagana i latou o lavevea mai taavale, e le o toe maua la se tulaga faapena. A o latou ia e aafia mai, e aafia i mai oso. O i latou e oso faafuasei le mai, ona oo ai lea i le tulaga lea. A e o lea o lo o faatino lava e le Matagaluega ia le toe auina mai o latou tino maliu e toe faafoi mai i Samoa nei.

E pei o le tulaga lea ia tatou galuega faavaitaimi, o lo o taumafai lava ina ia aua ne i aafia i latou o lo o i galuega faavaitaimi, aafia pisinisi i inei, aafia ma nuu, aafia foi ma alalafaga, ona o i latou nei o lo o faamoemoe i ai le tautuaina o aiga ma nuu.

E le gata foi i lea, o lea e i ai le tatou polokalame lea o le tai miliona, e tatau ona i ai nisi e nonofo i inei e faatino lea tulaga. O le faamatalaga lena e uiga i le tatou galuega faavaitaimi. E talitonu o lena tou te malamalama i le tulaga lea.

**FOFOGA FETALAI:** Se i fai mai se malologa a le Afioga i le Minisita. Tulai mai le sui usufono mamalu mai Satupaitea.

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai, se i se koma a le Minisita. E leaga o le mataupu lea sa ou talanoa i ai i le taimi sa fai ai foi se faamatalaga. E muamua ona faafetai atu i le Afioga i le Minisita, i le tulaga lea i le faaopoopo o se isi a tatou liaison officer.

E faafetai o lena ua ofo mai Ausetalia, aua o talanoaga lava nei na fai i ai, e fesoasoani mai, e tele tele le fesoasoani a Samoa lea e avatu. Ae saolele le Afioga i le Minisita, e fai lava si tele o le nuu. E oo foi i le toalua, toatolu, e faigata tele ia galuega a tagata nei, ae toatasi le la e i ai. Ae faafetai o la o le a faatupe mai e Ausetalia.

O se tuualalo lava i lau afioga, se omiomi pea lo tatou va ma Ausetalia, e faatupe e latou le isi 5 tausaga. Aua o le mea lea e fai, e faaoso mai e latou, ona toe toggi mai lea o le polo ia tatou. Ae a faatalatalanoa lava si tamaitai Ausetalia lea ua komesina nei, e lelei lava foi. E faatupe e latou lena tagata o le a tele lava le lelei o le tamaoiga i le tulaga lea ua i ai i le toatele lea ua o. Ua toatele lea ua o i Ausetalia i lo Niu Sila.

Ou te faamoni lava i le saunoaga a le Minisita i le tulaga i mea nei o faafitauli ua tulai mai. Aua o lea ua toatele, ua tutupu ai foi la ia le tele o faafitauli. E sao lelei le tulaga lea i le faamaoni o tagata ia e o, e o atu nei i le tatou Matagaluega i le Ofisa o latou e leai ni galuega, o i latou e leai ni taitoalua. O latou e a ma a, e sao lelei, e toe lava o ni agelu felelei loa i le lagi. Ae oo atu loa i o, ona o ifo lea i luga o le facebook, ua laulau mai le leaga o le a ma le a.

O le taimi o le suiga o le Faigamalo lau Afioga i le Fofoga Fetalai, ua oo i ai le faaiuga a le Kapeneta e toe review, ae faafetai o lea ua faalogologo atu, e pei o lea ua tauave e le Faigamalo nei le review o le scheme atoa lava, mai lava i tagata mai le atunuu, e o i galuega i fafo ma toe foi mai, the whole scheme. Ona sa fai foi ia tapu ma faasalaga, a faaletonu mai le tagata i o, e le toe o nisi o lona aiga i malaga nei, ma le latou nuu. Ae ua fai foi, ua toe alofa foi i le tagi tagi mai foi lea, e tusa la na o le tagata lea e faia le mea valea i o, e aumai. A o e faalogo atu, ua amata lava ona toe tupu foi.

O le tuualalo i le Afioga i le Minisita i le tausisi o le faamaoni o tagata nei, aua e saolele, o leoleo, o faiaoga, o fomai, o lea ua talosaga mai. A e le iloa e le Matagaluega o ni fomai, e o mai lava fai mai, e leai sana galuega. Atonu o se fesoasoani mai alii ma faipule, e pau ia o i latou latou te silafia i latou nei ua talosaga mai, pe i ai ni o latou aiga, pe i ai ni o latou taitoalua. O le isi foi mea lea ua o nisi o i latou ae tia fanau. E pau lava lea o si tuualalo, a toso mai i totonu alii ma faipule e pei o le mea sa i ai, atonu e toe maua ai le faamaoni o i latou nei e omai e sue galuega. E po o i ai ni latou galuega pe leai. A aumai o la e faigaluega i galuega a le Malo, e oo lava i galuega a le

Ofisa lau Afioga i le Fofoga Fetalai, ua o principal officers i o ae tiai galuega a le Malo, senior officers, ua manao i le tupe vave lea. E le tio foi se isi i ai, ae o le umi o le gasologa ma le umi sa tapena ai lenei polokalame. O i latou ia e leai ni galuega, ia fesoasoani i le tamaoaiga o latou aiga, ia tau tutusa ai ia le level foi lea o tagata o le tatou atunuu, ma i latou ia e maua galuega faapea.

Ae faafetai i le Minisita o lea e faalogologo atu, o lea e faatoatoa lava le tele o vaega sa ou feagai foi ma au. Ma lou faaaloalo.

**FOFOGA FETALAI:** Ia faafetai i le sui usufono mo Satupaitea mo le fesoasoani. Saunoa mai lau afioga i le Minisita.

**Tofa Hon LEATINUU WAYNE SOOIALO:** E faafetai atu lava i lou uso a sui usufono mo le tuualalo aemaise foi o fautuaga, o lea ua faamau uma i i. E saolele lava le saunoaga, e tatau foi ona tatou tilotilo tatou ia i latou o lo o faatinoina le galuega i inei, e le o ni agelu foi. Aua e le o iloa po o i inei po o o lea e mafua ai le faafitauli. Ae tatau lava ona tilotilo uma i itu e lau. Ae mo le fautuaga ua uma ona aumai, ia faafetai tele lava i lau afioga, e sao lava. O oe sa amatalia le tatou polokalame, ae o lea ua ou oo mai, ua i ai nai faafitauli.

O le isi tulaga, e pei ona fai o latou taitoalua, e faasaini le pepa e malie ai e alu lona toalua i fafo, ia le consent form. A o le faalavelave, o i latou foi ia, o lea foi ua toe omai, ua toe mananao e toe aumai o latou aiga ua o i fafo. A uma ua sauni o le a faatietie i le vaalele o le a toe omai. Ae toe oo atu ae fai mai malie lou finagalo, o lea ua uma ona ma faalelei. Ae manaia le toe tuu i o, e fesoasoani mai. O tulaga lava ia, ae talitonu le agaga, o tulaga lava ia, ma i tatou ua i ai tulaga faapena.

Ona ou oo mai lea i nisi sa fesiligia le tatou daylight savings. E pei ona silafia, o le daylight saving sa i ai suiga i le 2009. O lea sa sau ai lava ina ua oo mai i le taimi ua tilotilo foi lenei Faigamalo, ma matou tilotilo foi i na i fautauga. Aemaise foi o fautuaga e aumai i matua, aemaise matua e omai i nuu i tua. E omai a latou fanau i Apia e aooga, i le tulaga lea o le usu mai o a latou fanau i le taeao o la e pogisa. Ae oo i le taimi e toe foi atu ai i le afiafi e uumi lava taimi e o atu ai, e o atu faatasi ma tagata faigaluega. E le mafai foi ona nofonono le Faigamalo, e tatau ona tilotilo uma i itu e lua. Po o fea le itu ma talafeagai ona faaauau ai pea le tatou daylight saving. Ae peitai ua tilotilo le Faigamalo o lo o i ai i le taimi lenei, e leai ua tatau ona taofi. O le mea foi e lelei ai, e le tau aumaia i totonu o le Palemene e sui atu ai le Tulafono, o lea ua uma ona i ai le Tulafono.

E pau lava le suiga o lo o i ai, e na o le faamaoniga a Le Ao o le Malo ina ia sui ai ma tulaga faapena. O lea sa i ai le fuafuaga a le Faigamalo lenei, e sili pe a taatia ae tatou amanaia matua ia mai tua, o lo o i ai le faafitauli lea, i le popole ia latou fanau laiti, aemaise lava latou fanau teine aemaise le usu

mai i le taeao. O lea ua i ai le fuafuaga a lo tatou Faigamalo, tatou sui ia i lenei vaitaimi, i le taumafaiga a lenei Malo ua i ai. O lea ua tatou normal lava, o lea ua lelei, e leai se faafitauli. Ae vagana i latou e le o au i lenei suiga, ona oo lea i se tulaga faapena. Ona uma ai lea o Mataupu i Pisinisi, Alamanuia ma Leipa, vagana ua i ai se isi...

**FOFOGA FETALAI:** E matau atu o lea ua tulai mai le sui usufono o Sagaga Nu 2. Ia saunoa le sui usufono mamalu.

**Susuga Maulolo Tavita Aмоса (Sagaga 2):** E ese le manaia o le tamua i lenei taeao. E le o se upu lava e avane ai, ae faatupu manatu foi ma feliiu ai se tuualalo e avatu pea.

Lau afioga i le Minisita, sa ou taua i le tulaga lea o Leipa, se i silasila ane pe mafai ona fai se faiga faavae e lesitala ai ia casual workers po o i latou ia e faigaluega togiaso. E i ai le mafuaaga lelei, a ua atili uunaia au ma lenei itumalo i le faalogologo atu i le aso ananafi i saunoaga a Minisita. Aemaise le Minisita o Faatoaga i le tele o avanoa lea o le a tulai mai ai le aufaipisinisi laiti e manaomia le autogiaso.

A oo nei le mea o le methane gas, e tausaili nisi, e tasi lena mea e toatele nisi o le a galulue ai, le bio-gas lea.

O le aoga o le mataupu lea, silasila foi i tagata faigaluega a le Malo o lo o faamau uma o latou records ma mea faapena i le PSC. E manaomia foi la si na nofoaga, lea ou te manatu o la outou Matagaluega lea. E faila ai ni faamaumauga o tagata faigaluega togiaso. It's a win win situation for both employer and the employees. O se tulaga e lelei e puipuia ai tagata faigaluega togiaso, e puipuia ai foi le aufaipisinisi laiti, o lo o latou faafaigaluegaina tagata togiaso lea.

A faapea ou te manao atu i se isi i lau galuega lea togiaso, e faigofie ona faafesootai atu la outou Matagaluega, po o ai o avanoa o e ua uma ona lesitala. A sau foi se isi e manao i sa na galuega togiaso. E mafai foi ona refer atu po o le a se tala mai i la outou ofisa, se track record e uiga i tagata nei. O le uiga lena o lau faamatalaga, ia i ai se mea e mulimuli ai lava, e faigofie ona iloa e le faipisinisi, po o le a le ituaiga tagata lea e sau, pe talafeagai ma lona manaoga. Aua o lea mea lea e i ai, afai atu e alu e aumai sona reference i le faifeau, ia tailo i ai, o lena lava tou te silafia. Ae o lenei itumalo, e feoloolo lava nai tagata faipisinisi laiti, o lo o manaomia ai le aufaigaluefa togiaso.

Ae ou te le i nofo i lalo, faafetai tele i lau afioga, ua ou fiafia lava i le faalogo atu o lea o le a toe review le tau o mea. Pe a ofi atu ai se pau laititi o basic food items. E pei o nai mea na, e pei ua lui mai e le Minisita o le EPC lana pau lea e 20%, a maua se pau mai tatou vaemoa, suka ma mea faapena. E le manatua pule, e le manatu faalaeo ae manatua pea lau Afioga i le Minisita.

**FOFOGA FETALAI:** Ia faafetai mo le fautuaga.

Mo le faasaoina o le avanoa o le Afioga i le Minisita, tulai mai le sui mamalu mai Vaimauga Nu 1.

**Afioga Sulamanaia Fetaiai Tauilili Tuivasa (Vaimauga 1):** Ua faivaese foi Lopepe i lenei taeao i lau Afioga i le Fofoga Fetalai, i le talia foi o lenei fonousu a le atunuu ma le tapuaiga a Samoa.

Ae o se manatu e avatu i le Minisita, ona o lea o le a see ese ma le Leipa. Ona o le uso nei, o se uso lava tuofe, o lena ua faamanuiaina oe ua e tulai mai i ina. Ia manatua mai au, ua e oo i lou malo.

O le reserve list lea sa taua, o lea o le a e oso ese ma le Matagaluega o Leipa, e ese le taua o le reserve list lea sa i ai. A silasila i o tatou afioaga i le tele o faleoloa i nuu i tua lea ua faatino se i tulou e nai o tatou tagata mai fafo. E pei o le agaga lena, e le mafai ona faatino e ni Saina ni faleoloa i nuu i tua, aua e le mafai ona compete ia le vaega lea ma o tatou tagata. Ae o lea na avatu lau tuualalo se i toe silasila ane i le reserve list, pei o mea na sa tuu i le tatou Faigamalo mo tatou lava tagata. E le gata i o tatou faleoloa laiti, rental cars foi, o taavale rental, o le tele foi o isi car dealers ia ua i ai, ua ota vaai foi ua fai a latou rental cars. E pei o le tuualalo, pe le o lavea ai foi ma pamu penisini. E pei o mea sa reserve mo tatou lava tagata. E le oo se faatauvaaga o si o tatou atunuu i nuu i tua, ona o tulaga o e o mai i fafo. O le agaga lena sa tuu atu i lau afioga i ou autafa, se i silasila ane i ai, ina ia tamau pea ia reserve list ia mo o tatou lava tagata. Ma le faaaloalo lava.

**FOFOGA FETALAI:** Lau Afioga i le Minisita.

**Tofa Hon LEATINUU WAYNE SOOIALO:** E momoli atu le faafetai tele i uso a usufono, o le tatou galuega lava e fai faatasi, o a foi ni fautuaga e aumai i ina, o lo o faamaumau lelei lava i i ia fautuaga o lo o aumai. Ae faafetai, faamalulu atu lau Afioga sui usufono mo Sagaga 2, ona ua pau ia te au le tulaga lena. O le mafuaaga lena o lea na ala ai ona aumai le \$20,000 i totonu o le Matagaluega o Pisinisi ma Alamanuia, ina ia vaevaeina i associations nei e 4, e amatalia ai le faatinoina o galuega ia.

E pei ona silafia foi e le Palemene mamalu, o lea sa faatinoina le National ID i le faaiuga o le tausaga na tea atu, i le taimi na latalata i le faiga palota, lea sa tufa ai le tai \$50. Sa i ai le agaga o i matou nei, ina ua oo mai i totonu o le Kapeneta, atonu ai ua i ai se database, e mafai ai ona iloa uma National IDs o i latou uma. Ae peitai ua uma ona tufa le tupe, ae leai se numera. O lona uiga e tele la se galuega o le a toe fia faatino. Ona e tataua ona o faatasi le \$50 ma le numera o le National ID. Ae peitai e le i i ai se tulaga lena.

O lea la ua i ai le fuafuaga a le Matagaluega, ia amatamea associations nei e 4, Samoa Workers Congress, o i latou ia e lesitala i ai tagata faigaluega i le Samoa Workers Congress ina ia maua ai se faamaumauga i ina. A e manao

i le tulaga lea e te faafinagaloina ona e alu lea i le vaega lena. Samoa Nurses Associations, e toatele le vaega lena o lo o i ai, e amata o lo o lelei, ae toe faaleleia laititi ina ia ave i ai le \$5,000, ina ia faatino ai administration work ia, e mafai ai ona faamaumau e i latou le vaega lea. O le Samoa Seafarers Association na ave i ai le isi \$5,000. O i latou ia e faamaumau ai, ina ia mafai ai ona maua ia tagata uma ia o lo o faigaluega i ina, ma lelei ai le faiga o latou association. Ma le tatou Public Servant Association tele lea o lo o i ai, o lea foi ua ave i ai le isi \$5,000, ina ia o lelei ai e fai le latou galuega lelei ina ia fai lelei le latou association, ma fai lelei tulaga ia, ina ia mafai ai ona e...O lona uiga, a fua la i se isi itu, a e manao i se tulaga e pei o le nurse, e te alu sao lava i le Nurse Association, e fai i ai, e fia maua le tagata lea e aumai e fesoasoani i le mea lea. Aemaise lava le Samoa Worker Congress, o i ina e o uma lava i ai tagata. Ae o lo o faalogologo atu le Matagaluega i le taimi lea. O lo o faamaumauina pisinisi i le taimi nei, e manaia foi le fautuaga ina ia mafai ai ona faatino tulaga ia. Ae se i tilotilo lelei le Matagaluega po o le a le ituaiga faatinoina, e mafai ai ona faatino ia casual workers ina ia mafai ona pue mai i latou i totonu, o tagata la ia e le mafai ona galulue full time. A o i latou ia e pei se pool tou te o i ai, e aumai ai i latou e mafai, e pei a e manao i nisi e fai lou maumaga, ona e alu lea e sue mai le vaega lea e faia uma tulaga faapea. E pei o le agaga lea lau afioga, ae faafetai mo le tuualalo, o lea ua faamauina.

O si ou uso mai Vaimauga, o lea ou te faamauina i i, e na o le tulaga o le SLC lea sa e fesili mai i ai, ina ia e manao e tufa atu fanua ia e i Vaialele, e tufa fua atu ma le tou nuu. E le faapea se i oo atu i le tulaga SLC, ou talanoa atu i le tulaga lea. Ae sao o lea ua e talanoa mai i le reserve list. Ia tagai foi lau afioga, ina ua amata ona faatino ia pisinisi a Saina i Samoa, e i ai lava le lisi e o i ai i latou, o wholesalers. E le mafai ona o i retailers. O latou e o i wholesalers, ae o o tatou tagata lautele e faatino pisinisi ia mo retailers. O le a le mea ua tupu? ua toe o lava retailers toe fai a latou wholesalers. E tusa e uma ona wholesaler toe sau i le isi vaega lea e tatau ona i ai. E tatau ona toe tilotilo le tatou Faigamalo, i le tulaga e tatau ona toe faataatia lelei ai le tulaga lea. Ia silasila foi lau Afioga, o le toatele o i latou ua aafifio mai iinei i atunuu mamao, ua nonofo ma tatou teine Samoa.

O le tulaga la lea, ua mafai ai ona lesitala pisinisi ia i lalo o i latou ia, ua ala ai ona mafai ona entitle i latou i pisinisi ia faapea. Ae tatau foi ona mataitu e le Matagaluega, i le taimi e lesitala mai ai pisinisi ia, ma fai loa asiasiga. Aua o le tulaga lea e i ai e oo lava i tamaiti na o mai e tafafao mai Saina, o lea ua fai a latou pisinisi, ae le o tilotilo lelei le tatou...e le faigofie. E fai o le involve o le Immigration ae o le involve o le MCIL ma i latou o lo o faatinoina uma lenei galuega. E tatau ona tilotilo lelei i ai, aua foi le faatinoina o galuega ia.

Ou te talitonu ua maea...

**FOFOGA FETALAI:** O lea ua toe tulai mai le sui usufono mo Sagaga Nu 2.

**Susuga Maulolo Tavita Amosa:** O lea lava sa taufaasolo atu na i tuualalo ia i le faasologa o le saunoaga a le Minisita. O le isi lea mataupu sa ou laga, ou te manatu e maga 2. E aofia ai lau Afioga, o fanua ia e lisi le SLC, ma le Afioga i le Minisita lea e vaaia le tulaga tau eleele. Sa ou taua tulaga i fanua ia o le matou nuu lea o Malie, lea e motu i tai ua leai ni mea e tua i ai. E talu ai la, o lea ua ou vaai aua e tuaoi tonu lava fanua ia ma le fanua o lo matou aiga i Afega. O lea ua ou vaai ua maea ona sub divide e le SLC, ae po o le a lou finagalo, e ala atu i le Afioga i le Fofoga Fetalai. Ae taua lava le saunoaga a lo tatou Malo, le Kapeneta ma le Palemia, ia le tulaga lea o le fetuutuunai, le va fealoai ma le alofa aua foi o tatou tagata. O lea la pe mafai ona faateletelegese lava se finagalo o lau Afioga ma le Matagaluega, ina ne i vave nofoia ia fanua ia. Aua o fanua ia sa lisi muamua e le afioaga o Malie.

Ae o le mea foi na tulai mai, o lea la ua ou toe tatalo atu ai, ae se i oo po o le a se finagalo o le Minisita o Eleele, ona toe avatu lea o lau mataupu lea. E pei o le pau lea o si mea, ona e maga 2 ia Matagaluega e aafia ai i le mataupu lea. Ma le faaaloalo lava.

**FOFOGA FETALAI:** Lau Afioga i le Minisita mo le faasaoina o le taimi. Tulai mai le sui usufono mo Lefaga ma Faleaseela.

**Afioga Masinalupe Makesi Masinalupe (Lefaga ma Faleaseela):** Ona o le matagofie le faalogologoa atu i le manino atoa mea uma. E pau lava lea ona e i ai na i faafitauli faapea i totonu o si o matou afioaga. I le tulaga lea e pei ona i ai ia Saina e lisi.

O lea ua tau manino atu i le reserve list, e pei o lea e i ai le tapu a lo matou nuu, e aua le faatinoa ni faleoloa o Saina ia matou. A o lea la atonu o lea e faafofoga mai, e faamautuina ona ua i ai nisi o faleoloa ua toe renovate mo Saina. O le tulaga e pei ona teena ai, (1) O Saina e pei na o le o atu lava e sue le tupe, e leai ni tautua i ekalesia, e leai ni alofa e faia i faifeau, e leai foi ni mea o faia i totonu o nuu. O le ala lea na teena ai e si o matou nuu ia lea vaega. Atonu e aoga foi lea e faafofoga mai nisi ona ua uma foi ona fai le tapu a lo matou afioaga. O lea ua maua atu nei, e na o wholesale lava e mafai ona latou faatinoina. Ae taatia pea retailers e faatino e nuu.

**FOFOGA FETALAI:** O lea ua maua atu le finagalo o le sui usufono mamalu. O la e taufaamatala mai e le Minisita le tulaga lea.

**Tofa Hon LEATINUU WAYNE SOOIALO:** Ia faafetai lava, o lea sa ou faamatala le tulaga lea, ae leaga e le i lauga mai le sui usufono. Ae a na faapea e lauga mai ai, ou te musumususu lava i ai ma fautua i ai. Ae faafetai o

lea ua faamauina i i, ina ia mafai ona faasoa atu i ai i se taimi. Ae faamalulu atu i le le oo atu o le tulaga lea i lau Afioga, ae faafetai ona o lea ua aumai mataupu tau fanua, ia o lea la o le a ou oo atu i le mataupu lea i le SLC.

E saolele le Afioga i le sui usufono mamalu, e na o le toalua sui usufono sa afea le tulaga lea, na o le sui usufono o Sagaga 2 ma le sui usufono mo Falealili 2 lea sa fesiligia le tulaga lea. A o le a ou amata atu e tali atu i le sui usufono o Falealili 2 sa fesiligia mai fanua o le SLC o lo o i o latou tuamaota. Ia o lea la ua i ai le suesuega. Mo le silafia e le sui usufono mamalu, o le aofaiga o fanua o le SLC i Falealili, e 251 eka o lo o i ai. O fanua ua maea ona vaevaeina, e 123 eka, na vaevaeina i le 2013. E taitasi eka mo fanua nofo lisi residential mai le itu i gatai o le aualatele o le Malo e agai i le sami. O nei fanua, o lo o ua nofoia e nisi o le afioaga o Matautu, sa totogi mai nisi o fanua nei i le tausaga 2015, peitai, e le o toe totogiina maia nei fanua ona o le faaletonu o auala e alu i fanua ia. O lea la ua i ai fuafuaga a le Matagaluega o le a fausia auala nei i le tausaga faaletupe 2022/2023. A uma loa ona fai auala ia, ia ona toe vaevaeina loa lea, ma amata loa ona totogi mai a outou lisi i le SLC.

O le isi 108 eka lau Afioga, ua maea foi ona vaevaeina i le 2021, le tausaga na tea nei, o lo o i ai eka tai 10 ma eka tai 8 mo auala ma faatoaga. O lo o talosaga mai foi le afioaga ia Matautu ina ia lisi atu i le nuu o lo o i ai foi a latou papovi se i tulou i le afioaga o Matautu. E le i faamautuina lisi ia i vaevae nei, peitai, e ave pea le faamuamua i le nuu o Matautu Falealili.

O lo o i ai le 20 eka o lo o totoe ai i ina e sosoo ma le sami, sa lisiina mo le fausia o le pisinisi faletalimalo, Princess Tui. Peitai, ua maea ona terminate le lisi lea i le 2020, o lo o avanoa nei le fanua lea mo pisinisi faa-faletalimalo. A o lo o tatalo mai pea le afioaga ia Matautu ina ia mafai ona vaevae atu mo... Ia o le agaga lava lea o le Malo lau Afioga ina ia vaevaeina. Silasila foi lau Afioga, o lo o faatinoina ia Vailele, Letogo, ia o lo o faatinoina ia Vaitele, Saina, Toamua, faapena ma Faleula, faatinoina i Fasitoo tulaga ia. O lo o vaevae lava fanua ia o le SLC ma ave le faamuamua i alaalfaga ia ma ave i alii ma faipule latou te faasoasoina fanua ia ma aumai loa e resitala i le SLC, ia ma faaauau ai lea o le tatou resitala. E faamuamua lava e le SLC le tulaga lea i fanua ia, ina ia mafai ai ona nonofo ai lava latou o lo o i ai i totonu o le nuu, aemaise foi le pulega a alii ma faipule. Ia, e faamoemoe lava le Matagaluega i tuualalo ma lisi o lo o aumai e nuu nei po o alaalfaga nei e faatino ai le galuega. E le o atu le SLC e faatino fua le galuega lena, e na o outou o lo o i ai fanua ia e mafai ona outou aumaia le tuualalo, ia ona resitala lea i i ma aumai e resitala i le MNRE ina ia mafai ai ona legal le tulaga lea.

Ia, e ese mai ai la le talosaga a le Afioga i le sui usufono mo Vaimauga 1. Sa tatalo mai i le tausaga lea na tea nei e avatu i le tai \$8,000 a le kuata eka. Ae sa ou i ai foi i le Palemene i le isi 5 tausaga, sa tatalo mai e tai \$35,000. Ia a o lea ua ou oo mai i le taimi nei, lea ua fai mai le uso ia te au e avatu



fua. Ia e faamalulu atu i le uso, e sao, o le taua lava mafutaga ia e le mafai ona aveesea, ae le mafai ona ou faia se mea faasolitulafono faapena, aemaise o lo o matau mai lena Itu, a ou faia atu nei ia te oe, ia o lona uiga o le a faia uma, ae leai se malosi o le Minisita e faatino ai, o lo o i ai le Tulafono e tataua ona tatou usitaia. A o outou lava, o tatou lava, a outou mananao e tufa, ia aumai iinei i le Palemene e tufa ai. A o le agaga lava lea, ia tatou alu ia, o lo o fia maua foi e le SLC se seleni leaga ua uma ona tele ina faatau o latou fanua, o lea la ua toe lisi ina ia taumafai e maua ai la le fuafuaga lea. Ae tatou onosai, tatou lototetele, tatou tatalo ma tatou faatuatua i le Atua atonu e fesoasoani mai i lo tatou vaivai, aemaise lava mea nei o fanua. E le faigofie, ae o mea lava nei o fanua e afaina ai le toatele. E i ai lava le popolega ona a oo loa ina sui le Komiti o Eleele a lea nuu ma lea nuu, ua agai atu i le ofisa o le Minisita, e mananao e toe sui aiaiga na faia e le isi Komiti muamua, ma tatou alu ai lava faapea, ma le maua ai lava ma se tonu lelei.

Ae malilie ia le tele o Komiti lea ua i ai, faapepa, faasaini lelei ni konekarate, faamautu lelei aiaiga ia, ona aumai loa lea e taatia iinei, leaga e le faavavau foi le Minisita o lo o nofo ai i tulaga ia e tataua lava ona sui. A afio atu le isi Minisita ae sau le isi Minisita a o la e i ai faamaumauga ua uma ona faapepa e usitaia, na i lo le sau o le isi fai le faatino i le tulaga e tataua ona i ai. Ia, ou te talitonu pau ia o mataupu a le SLC na aumai.

Ia, ona ou oo mai lea i le tulaga lea i le tatou CT Scan. Ou te talitonu se i faaopoopo mai le uso a Minisita i se taimi o le Falemai, ia ae e ao ona ou faapea atu, o le CT Scan matou te taunuu atu ua uma ona pasia e faatauina e le ACC i le tulaga o i ai. Sa i ai foi le CT Scan muamua sa i ai, sa faatauina foi e le ACC, ia ae peitai, ia ua leaga lea CT Scan, a o lea la ua fuafua le ACC e toe faafou le masini tuai lea ae toe aumai ma le masini fou. O le masini foi la lea ua i ai na alu ese mai Shanghai i le aso 15 o Tesema 2021. E taunuu i Aukilani i le aso 27 o Ianuari, ona alu ese mai lea ma Aukilani i le vaa lea o le Southern One i le aso 5 o Fepuari 2022. O lea la ua i ai le faamoemoe e taunuu mai Samoa i le aso 12 o Fepuari. A o le tulaga i le taimi lenei o tatou vaa, ia, na o ni mafaufauga ia ma le schedule lea ua aumai, a o lea ua uma ona fai le asiasiga a le ACC ma le Matagaluega o le Falemai i le mea e tu lelei ai le tatou CT Scan. O lo o ua faatu ai lava i le mea sa i ai muamua a o autafa ane, o lea la a faapea loa e taunuu mai, ona faalelei loa lea e le ACC ma le isi CT Scan lea na i ai, ina ia mafai ona faatino lua ai galuega ia i le taimi e tasi. A le o lena foi, reserve le isi ae faaoga le isi, ia pe faaoga on a daily basis le isi, ae reserve le isi mo tulaga e tataua ona faatinoina ai. Ae o lo o galulue. Ia, e le mafai ona tatou control ina le omai a vaa ma tulaga faapena, ae tatou faatalitali. E sao lava, ua manaomia lava le tatou CT Scan lea mo le taimi nei, aua tatou galuega faatino a le falemai. Ia, o le tulaga lena i le CT Scan.

Lau Afioa i le Fofoga Fetalai, ia ona ou oo mai lea i le tatou vaalele lau Afioa. E momoli atu le faafetai tele ia i latou na faasoa mai e uiga i le tatou

vaalele. Sa tilotilo totoa lava i ai le faigamalo lenei i le Afioga i le Tamaitai Palemia ma le Kapeneta i le taimi na matou o atu ai. Ae se i tau sue atu le Lipoti o le vaalele leaga sa matua tusi faalelei lava le Lipoti, ae ua ou manao e faitau atu i i, a o lea ua foliga mai ua le iloa i totonu o pepa ia. Malie lau Afioga i le Fofoga Fetalai...

**FOFOGA FETALAI:** Ia, se i tau sue ifo lau Lipoti, se i tulai mai le Afioga i le Tamaitai Palemia.

**Afioga Hon Fiame Naomi Mataafa:** Ia se i tau saili le Lipoti a le Afioga i le Minisita. Ua ou vaai atu ua oo foi i le taimi o le tatou malologa, po o le a sou finagalo, e taua le mataupu a le Minisita.

**FOFOGA FETALAI:** Ia, ua fetau tonu lava le sailiga Lipoti... Ia, faafetai i lau Afioga i le Tamaitai Palemia, ua talafeagai foi ma le sailiga o le Lipoti a lau Afioga i le Minisita.

Ia, o lea ua tatou taunuu mai i le tatou malologa masani, o le mea lea, o le a faataatiaese Galuega a le Fono Aoa mo lana malologa masani.

*Na faataatiaese Taulumaga a le Fono Aoa Faitulafono mo lana malologa masani i le itula e 10:43 i le taeao ma toe faaauau i le itula e 11:20 i le taeao.*

**FOFOGA FETALAI:** E faasilasila atu ua toe amatalia nei Taulumaga a le Fono Aoa Faitulafono.

E momoli atu le faamalo i le tatou Maota mo le onosai i le faaauauina o le tatou galuega. Ua matu i fau le taligasua, e i ai foi le talitonuga ua maua se faasiliga malosi e faaauau ai le tatou galuega. Malo faafetai.

Ou te tapa ma le faaaloalo lau Afioga i le Palemia mo se lafo.

## **LAFO MO LE TOE TEUTEUINA O ITULA FONO**

**Afioga Hon FIAME NAOMI MATAAFA:** Lau Afioga i le Fofoga Fetalai, ua molimauina lava le sologa lelei o le faagasologa o le tatou galuega i lenei aso. Ua i ai foi le manatu e manaia ae tatou faaauau ai i le tulaga lelei ua i ai. I le ma le isi, e silafia foi e le tatou Maota le anoanoai o galuega mo le manuia ma le puipuiga o le atunuu ua fia tagofia e le Kapeneta.

O lea ua ou tulai ai ma le faaaloalo tele e faatu le lafo, *Ina ia faataatiaese a tatou Tulafono Tumau 32(1) mo le suia o tatou itula Fono mo le aso e faapea; tatou faaauau seia malolo i le 1:00 i le aoauli e pei ona masani ai,*

*ona tatou toe faaauau ai lea i le itula e 2:00 i le aoauli seia maea a tatou galuega e pei ona faatulaga mai i le Pepa o Galuega o lenei aso.*  
O le lafo lea ma le faaaloalo.

*Faaluaina e le Sui Palemia ma le Minisita o Faatoaga ma Faigafaiva.*

*Na faamaonia le lafo.*

**FOFOGA FETALAI:** O le a faaauau le tatou galuega e tusa o le lafo ua faamaonia.

E faataatiaese a tatou Taulumaga mo le tatou malologa o le taeao o lo o saunoa le Afioga i le Minisita mo Pisinisi, Alamanuia ma Leipa e talifuitau i mataupu sa laga i saunoaga a sui usufono mamalu.

O lea ou te tapa lau Afioga i le Minisita e te tulai mai e faaauau lau saunoaga. Oi, ia e matau atu o lea e tulai mai le sui usufono mo Falealili. Ia se i saunoa mai lau Afioga i le sui usufono mo Falealili 2.

**Afioga Maiava Fuimaono Tito Asafo (Falealili 2):** Faafetai i lau Afioga i le Fofoga Fetalai mo le avanoa. Ia, mo le faasaoina o le taimi o le saunoaga matagofie a le Afioga i le Minisita, ona o lea ua faalogologo atu o lea ua afea e le saunoaga eleele o lenei itumalo o Falealili 2. O lea ala lea o lou tulai atu ma le faaaloalo i lau Afioga, ona o le eleele lea sa taua e le Afioga i le Minisita, o Matautu i le itu mai lea i Falealili 1, a o Falealili 2 lea sa avatu ai se folasaga i aso ua tuanai. O le ala lea o lou tulai atu ona o tuamaota o lenei itumalo lea na alu atu ai le folasaga, ma le agaga faaaloalo i lau Afioga i le Minisita, o tuamaota lea o le nuu lenei o Salani, ona o fanua ia e i ai e fia malamalama po o le SLC po o le Siosiomaga, vaeane lau Afioga i le Fofoga Fetalai.

Ia e pei o si mea lea e fia faamalamalama faamolemole, ona o lea e faafofoga mai le matou itumalo, ona o lea ua saunoa le Afioga i le Minisita, ia o Matautu i Falealili 1, ae le o Falealili 2 faamolemole.

E pei o si vala lea e fia malamalama ai lenei itumalo. Ma le agaga faaaloalo.

**FOFOGA FETALAI:** Faafetai mo le saunoaga a le sui usufono mamalu. Ia, lau Afioga i le Minisita o Pisinisi, Alamanuia ma Leipa.

**Tofa Hon LEATINUU WAYNE SOOIALO:** Ia, faafetai lava i lau Afioga i le Fofoga Fetalai, o lenei ua tatou taunuu mai i le isi vaega o le tatou fonotaga. Ia, e talitonu ua matu i fau le taligasua i lenei taeao. Faafetai i lau Afioga ma le Matagaluega i lo outou gapatia i tapenaga aua foi le tausia o le tatou Fonousu a Samoa. Ae momoli atu le faafetai foi i le faafesili a le sui usufono, e saolele lava le sui usufono, o lea sa fesili mai i fanua ia. E pei ona silafia foi e le tatou Maota, e 3 Matagaluega e i ai fanua.

O le fanua lea sa ou talanoa atu ai o le fanua o le SLC. Ia e i ai foi fanua i lalo o le STEC po o le Esetete Tausi, ae i ai foi isi fanua i lalo o le MNRE. O le tulaga la lea sa e fesili mai ai, ia atonu o lea ua sauni mai se isi o sui usufono ia e toalua e tali la lau fesili, a o lea ua ou tali atu i le fesili foi na tuu mai, a faapea o Matautu lea e i ai, ia atonu o lea ua malamalama foi lena itu o Falealili 1 i le tulaga o lo o i ai fanua ia i Matautu. Ae masalo o le a maua atu se fesoasoani lau Afioga pe a tulai atu le Minisita mo le Siosiomaga.

Lau Afioga i le Fofoga Fetalai, ia ona ou oo mai lea i le Matagaluega mulimuli foi pei ona e silafia e uiga foi i le tatou vaalele, po o le tatou Samoa Airways. Ia e talitonu e 9 Matagaluega e i lalo o lenei vaega, ae peitai ia pau ia o fesili na aumai, na o Matagaluega ua uma ona ou talanoa atu ai. Ia ma tali atu ai foi i fesili sa tuu mai. A o faafofoga mai le tatou Matagaluega, e le faapea ua le aofia le Matagaluega o lo o e vaaia ona faapea lea ua leai se faafitauli po o ni mataupu foi, ae tatou nofo sauniuni pea mo le agai atu i luma aemaise foi le Tala Autu o le Tupe pe a tatou oo atu i ai, ina ia outou tapenapena pea aua foi ni finagalo o le Fonousu a Samoa.

Ae o lenei taimi, o le a ou taumafai atu i le Samoa Airways, ou te iloa ua tele ni manatu ua uma ona faaalua, ua uma foi ona tali atu le tele o fesili. Sa i ai lava le agaga o le a le toe afea le Samoa Airways, ae leaga e taua tele le atinae lea mo le tatou atunuu ma le fuafuaga foi a le Malo ua uma ona i ai. Ia o lea la o le atinae lenei e le i faigofie ona faia i ai se faaiuga a le tatou Malo, ona e taua le i ai o vaalele e faatino ai manaoga tau femalagaaiga a le atunuu, e fesoasoani ai i atinae o le tamaoaiga i turisi, o auaunaga ma avanoa faigaluega. Ae peitai, i tulaga tau tupe a le kamupani, faapea ai ma le aafia o femalagaaiga i le va o atunuu ona o le faamai, ua manino ai le le gafataulimaina e le Malo ma le kamupani e toe faaauauina le vaega lea o ana pisinisi po o le check operations lea.

A tuu foi i le saogalemu o le vaalele mo femalagaaiga, ia o lena ua saunoa manino le Minisita o Vaalele Sivili, e le i mafai e le kamupani ona ausia tulaga talafeagai, minimum requirements e lele mai ai le vaalele i Samoa ma faatino ai ana pisinisi masani o le feaveaiina o tagata mai Samoa nei i Niu Sila faapea foi Ausetalia. E le o gafatia foi e le kamupani i ana tupe maua, ona faatautaia lea pisinisi, aemaise lava le check operations mo le isi 5 tausaga o i luma. E tatou te ioe, e tataua ona i ai se tatou lava vaalele, ae mo le taimi nei, e fua i tupe maua a le kamupani, ma le aafia ai o faigamalaga masani i le va o atunuu ona o le faamai o le Koviti-19.

O se faaiuga talafeagai lea ua faatinoaina nei e le tatou Malo, ina ia faafoi le vaalele ma faamutaina le lisi. E i ai luitau e mafai ona tauave e le Malo i se tulaga e mafai ona toe faatupulaia ai le tamaoaiga aemaise ana tupe maua. A o le vaalele ma lenei vaitau o le le mautonu o femalagaaiga, e leai se naunautaiga o le tatou faigamalo e tauave ai lea luitau ma le mautinoa e atili faatupulaia ai le gau aano o le kamupani, aemaise o lea e i ai foi le

nonogatupe tele a le kamupani o le Samoa Airways lea e i le tatou UTOS i lalo o faamalumaluga a le tatou Malo. O lea ua galulue le Malo ma tapena feutanaiga ma le kamupani na lisiina mai ai le vaalele. O saunoaga foi faapea o le lisi aupito sili lea ona taugofie, mo le vaalele laupasese le Jet lea, ua ala ona taugofie le lisi, ona o lea ua tele ina tutu vaalele ua le o toe feoi ona o aafiaga o le Koviti-19 ma le faamai. E ui foi i le taugofie o le lisi i le uluai 6 masina o le lisi, e le taugofie lea i le vaai a le Malo pe a fuafua atu i tupe ua faaaluina, ma o le a faaaluina mo le faatautaia, technical requirements faapea le mautinoa o lo o i se tulaga lelei, service maintenance le vaalele i taimi uma, a o le i amatalia ana faigamalaga.

E i ai foi isi sa talosaga mai ona o se Lipoti e tatau ona aumaia i totonu o le Palemene, ae o le a maua se atoaga o le tulaga o taunuuga o galuega a le kamupani pe a tuuina mai ana Lipoti Faaletausaga i le Palemene e tusa ai ma Tulafono a le Maota. Ia, le mamalu o le tatou Palemene, masalo e i ai se taimi ona faaoo mai lea o Lipoti a le kamupani e pei foi o aiaiga o le Tulafono masani, e tatau ona faaoo atu i le Kapeneta ia ona momoli mai ai lea iinei i le Palemene aua foi iloiloga a tatou Komiti Faa-Palemene.

Ia, o le tulaga lea lea ua i ai le tatou vaalele, e faamalulu atu ai i e o lo o taumafai mai pea, ia tatou onosai i le tulaga lea ua i ai, o lea ua fai feutanaiga ina ia mafai ona toe faafoi.

O le a ou le oo i le tulaga tau tupe, a i ai se taimi ona faatino mai lea o le Lipoti a le kamupani vaalele, o le a aumai uma ai lava ma tulaga ia, e ao foi ona silafia e le tatou Palemene le tulaga ua i ai.

Ia, o se faamatalaga lea e uiga i le tatou vaalele lau Afioga i le Fofoga Fetalai, e faaiu atu ai le...

**FOFOGA FETALAI:** Ia, tulai mai le sui usufono mo Anoamaa 1, o le vaalele lea e te fia fesili ai po o... Saunoa mai le sui usufono mamalu.

**Afioga Alaiasa Moefaauouo Malagaitutogiai Sepulona Moananu (Anoamaa 1):** Lau Afioga i le Fofoga Fetalai, ia ua faalogologo lava foi i le saunoaga ma le folasaga a le Afioga i le Minisita.

E tele nai mea na aafia i le matou foi lauga ma le... a o lea ua oo i le tulaga lea o le a faaiuu le saunoaga a le Minisita i le vaa, lea ua faaiu i le vaalele. Lau Afioga i le Minisita, o au le sui usufono lea na fesili i le Lipoti. Ma ua ou nofonofu lava ma ou faalogologo i a outou fetufaaiga ia sa fai i taualumaga o le tatou Fono, ua ou manatu ai, ua ou malamalama foi, ua ou le toe manaomia foi la se Lipoti, ae se i ou faatalitali i Lipoti la ia faaletausaga ma tulaga faapena. A malamalama lava se mea, ia ona uma foi lea o le fesiligia o le tulaga faapea. Aua na pau le mea lea sa ou faapea i le Lipoti ona faapea o le a tele le tupe gau, se i tulou, pe o le a faamaumau ona o mea ia o contractual agreement ua soli e le isi vaega o le faiga o le tulaga lea. O mea ia ae ui i lea, o lea ua saunoa le Minisita, ua aumai foi le finagalo

o le Palemia i le suiga o faiga faavae, pei o le ala lea ua ala ai ona toe faapea le feliliuaiga o le tofa i le Malo.

O isi mea ia sa ou talanoa i ai i lau lauga a o ou i ai i le Minisita, ia o mea lava ia i le tau o le soifuaga. Faafetai o lea ua tatou malamalama uma lava ua siitia i luga tulaga foi lea o felauaiga i vaa ma mea faapena. Ae po o le a le mea o le a tatou vaavaai i tatou nuu i tua ae apply pea i ai le tatou Tulafono lea ua i ai o le faatauvaga, leaga e i ai la isi mea ia ua tulai mai i le atunuu, e pei e vaioa tua ae na o le taulaga e faapena ona faataga ai le faiga o oloa ia e faatauva mo le taugofie mo tatou tagata. Leaga o lea ua uma ona fai le tatou Tulafono.

Ia, o le isi mea ia o tatou fanau foi ma latou o lo o i galuega ia, se i tulou lava, o au sa fai si au interview i le isi alaleo lena i le mea lea o le galuega faavaitaimi, ma o le upu lea na ou faaogaina se i tulou, le faafofoga a le atunuu. O le mea lea tatou te vaai o le alagatupe, a o lea ua o atu le tele o tagata vaai i ai, o le pologa le mea la e fai. E le o se mea faigofie le tulaga lea.

O le ala foi lea e tataua ona malamalama ia tagata nei e fia o, e le faigofie le mea la e fai. O la e momoe lelei papalagi e ona, ae o la e malulu pe vevela, ia o le mea la lea e tataua ona... ae o le isi mea o le tali e foia ai mea ia, o le tuu i nuu ma afioaga, e faapena ona fai aulape i tagata faapea e o atu i o ulavavale ai.

Ae o le faalavelave lea ua aapa atu foi le Malo aumai uma e faatonutonu e i latou ma nai isi tagata e toaitiiti, ae a vaavaai i ai ia pulega a alii ma faipule, e au lava le pule a alii ma faipule po o Niu Sila po o Ausetalia i le mea e i ai.

Ia o la ta ita lea aotelega i le saunoaga a le Minisita ae malo faafetai o lea ua malamalama lelei nisi o vaega sa fia malamalama ai. Ma le agaga faaaloalo faafetai.

**FOFOGA FETALAI:** Malo faafetai mo le saunoaga a le afioga i le sui usufono mamalu mai i Anoamaa Nu.1.

**Afioga Lauofo Fonotoe Nuafesili Pierre Lauofo:** Lau afioga i le Fofoga Fetalai...

**FOFOGA FETALAI:** E talitonu o lea ua malamalama lou finagalo faafetai foi mo lou finagalo malamalama i le saunoaga malamalama a le afioga i le Minisita. Ia malo lava faafetai, faafetai foi le lagolago. Se i tulai mai le Afioga i le Sui Taitai o le Itu Agai. Pe ese se isi...

**Afioga Lauofo Fonotoe Nuafesili Pierre Lauofo:** Faafetai i lau afioga, o au foi sa talanoa i vaalele. Ia e pei foi lava ona maua, ia o lea ua fai le faaiuga e faafoi. Ia o lona uiga la e le toe tele sau ia faamatalaga ae e pau le mea e i

ai le fesili, ae faafetai o lea ua faamanino mai e le afioga i le Minisita itu lelei, tamaoaiga faapea foi tulaga i le atinaeina o aiga ma le lautele o le atunuu o lo o faaaogaina foi ia atinae o le tatou vaalele.

Ae o le fesili foi lea pe o le a se fuafuaga a le tatou faigamalo ma lau afioga i se taimi lata mai, po o i ai se fuafuaga e toe aumai se vaalele pe ua leai. O lea foi sa ou taua foi lea o la foi e tele foi isi kamupani vaalele i le Malo o Saina pe i ai foi se latou fesoasoani po o se vaalele e fia malaga mai i Samoa nei.

O le tulaga foi lea pei ona malie i saunoaga a isi sui usufono ina ia i ai se isi vaa pe faatauva ma le vaa lea. O lea ua ou vaai atu nei i le telefoni i pasese a le Air Niu Sila lea ua \$2,400 i le one way. E pei o le tulaga lena e mafua ai ona fesili atu ai i mea ia, ia pe o le a se fuafuaga foi lea. E pei o le faafesili atu lena ma le faaaloalo lau afioga.

**FOFOGA FETALAI:** Ia ou te iloa o lea...

**Afioga Hon Lautafi Fio Selafi Purcell:** Lau afioga i le Fofoga Fetalai....

**FOFOGA FETALAI:** O lea ua matau atu ou te iloa o le vaalele lea e tulai mai ai lau afioga. Ae a silasila lava ia le tatou Maota ua atufia saunoaga a le Malo i le vaalele. Ma e ou te talitonu foi o lea foi ua uma ona faataatia mai ia faiga faavae ma alafua o le a agai i ai le faigamalo.

O le mea lea ou te alofa atu ua... o le tatou taimi. Ia o lau afioga foi o le sui usufono matua lau afioga le sui usufono o Satupaitea. Ae alofa aua e te toe pai i le vaalele o lea ua uma ona tali le Malo. Ma e leai lava se isi tali i talatu i le tali a le Malo lea ua i ai.

Ia tulai mai ia le sui usufono mamalu.

**Afioga Hon Lautafi Fio Selafi Purcell:** Ia faafetai ona o lea ou te faalogo atu e le i mautu, e le i maea le tali a le Malo lea e faagasolosolo mai lava manatu o e sa tuu ni o latou fautuaga ma ni tuualalo. E leai foi se manatu e faigata tele ona ou nofonono lau afioga leaga o au lea sa Minisita o Vaalele i le taimi lea sa taumafai ai faiga uma nei.

E leai foi se manatu e toe faatautee i fuafuaga foi ua i ai a le Malo. O lea sa fai ia matou fuafuaga i a matou foi talitonuga ona o la e faafofoga mai Samoa o la e lava taulimaina ia le tatou vaalele i le matou taimi lena. O lea na amata mai i le 2 tausaga talu ai. Ia ua outou tulai mai, ia o lea foi e ese ia la outou silasila.

Ae tatau pea ona avatu se leo, leai sa tapena lava i le mea e gata ai le tapena, e le faapea na fai atu lava e gau ae fai lava. Leai o tupe foi lea faapea e borrow, ia o le lelei ia o le payment record a lo tatou vaalele. O loan ia na fai mai i le UTOS, na uma lava ona totogi. O le loan fou lea na toe alu atu nei, e pei o lea ua fai si matau o le Malo faapea e le mafai ona totogi. Ia

saunoa foi nisi ia o le aoga lena o le UTOS. E o e sue ia mea e invest ai tupe a tagata ia e maua mai ia latou returns.

O le vaalele lea faapea ne i te i ua tele ia maintenance, o le mea foi lena na ala ai ona aumai ia le vaalele toeitiiti lava fou e na o le 6 tausaga. O mea uma na na tilotilo i ai, e aumai e pei o le isi 6 tausaga ona amata tagi mai lea o le vaalele i ni mea. Leai la ni mea tele e fai.

O le mataupu lea sa faaali e si ou uso anapo o lea ou te talosaga atu ai lau afioga sa tuu mai le lipoti lea na saunoa mai le... leaga e 2 Minisita lea sa o matou feagai, o le afioga i le Minisita o Galuega ia ma le afioga i le Minisita o Vaalele. O lea la e pei o le fesooaiga a le toalua lea, lea ua maua ai le tonu a le Malo, ia e le faitio atu se isi i ai.

E pei ona ou fai atu, afai lava o lea ua aumai le lipoti e le sefe le vaalele, e pei o lea na saunoa atu. Ia na ona pau lava le mea aumai i totonu o le Maota e tilotilo i ai aua ou te le iloa tonu ia Olo, ia pe o si fasipepa na nofo lava ia anapo ma faalau mai, lea ua o tatou ioe atu i ai. E iloa foi Olo e... ia e ui i lea, o le eseese lava o le...

**FOFOGA FETALAI:** Ia o lea ua maua le finagalo o lau afioga i le sui usufono mamalu...

**Afioga Hon Lautafi Fio Selafi Purcell:** Ia o le eseese o le vision a le matou foi itu, faataua le manuia lautele, spinoff lea e maua i le vaalele, not necessarily pe mumu ia le Trial Balance pe lanu uliuli le figure i lalo e tapenapena i le...

**FOFOGA FETALAI:** Ia....

**Afioga Hon Fiame Naomi Mataafa:** Lau afioga i le Fofoga Fetalai....

**FOFOGA FETALAI:** Onosai mai le sui usufono mamalu se i tulai mai ia le Tamaitai Palemia.

**Afioga Hon Fiame Naomi Mataafa:** O le mea e fia faasao. O le autu o le tatou faamoemoe ma le mataupu o lo o talanoaina, faiga faavae a le Malo lenei. Ua maea le taimi o le Malo talu ai. Sa mulimulitaia ia faiga faavae. E le o se faafinauga la, seivagana o lo outou saunoa mai e le o lelei le faiga faavae lea, ia o lena. O lo outou faitalia.

Ae e pei o le a toso umi le tatou mataupu lau afioga i le Fofoga Fetalai, ua fai le faaiuga o lea ua faagasolo.

**FOFOGA FETALAI:** Faafetai, ia o le mea tonu lava lena lau afioga i le sui usufono mamalu o Satupaitea. Ua manatu ua lava ma totoe saunoaga a le Malo i le vaalele. Ou te talitonu foi o lea ua saunoa le Palemia, o le taimi



o le faigamalo lea ua i ai nei. O a foi mea sa outou fuafuaina, ia tatalo o lea ua tulai mai le faigamalo ua i ai nei, tatou mulimulitai, onosai ma tatou tatalo ia manuia le faamoemoe.

O le mea lea, taatia ia o tatou lagona i lena tausaga ua tuanai, ae tatou agai e lagolago ia le mea lelei mo le atunuu. Se i tulai mai lau afioga i le Minisita.

**Tofa Hon Olo Fiti Afoa Vaai (Minisita o Galuega, Felauaiga ma Atinae Eseese):** Lau afioga, faafetai tele mo le avanoa e le oo sau tala i le vaalele ua manino ia itu uma. Ae o faaliga ia o le ma galulue faatasi ma le Minisita o le Vaalele. E galulue faatasi le Minisita o Vaalele ma le Minisita o le Malaevaalele.

Ia o le mea lena sa tupu ia oulua ma le Minisita o Malaevaalele lea sa i ai muamua. E le fesoasoani atu ia te oe, vaai e le o i ai i ina. O lea na matou iloa nei, e i ai lava le va o oulua na i ai. Na mafua ai ona faaletonu ia le atinae lea ia oulua.

Ia ae aumaia le lua faatuatuaga ia maua, o lea ua sao le mea lea ua fai.

**Afioga Hon Lautafi Fio Selafi Purcell:** Lau afioga i le Fofoga Fetalai e tasi lava sina avanoa. Leai o le lagolago ia ua tuu atoa atu. E mafai ona ou fai atu, o le a ou tatalo malosi atu mo le tatou vaalele pe afai ua le aumaia. O le lagolago ia i le Malo, na ua avatu, o lena ua avatu. Ae e pau lava sa ou fia, e i ai foi mafuaaga sa matou faia e matou te i faapea mai ia le atunuu, ia vaai ana le omai lava ia le FAST e leai e i ai foi matou... ae o lea ua saunoa le Tamaitai Palemia, ia e ese foi outou ia tatou o ai i lena.

Tatou e tatou felelei lava i le vaalele e pau lava le mea lea ou te fiafia ai, e le o le Samoa Airways lea na aumaia le faamai i Samoa. O tama ia papalagi ia e pei o le saunoaga a Laauli, tatou o e fai ia mea faaSamoa, aua tatou o e aumai mea a papalagi ae o lea ua o tatou o aumai mea a papalagi lea la ua oo mai le faamai i Samoa.

Ia lau afioga ia tatou tatalo ia i le Atua, ia iu manuia a tatou taumafaiga ia aua ne i tulai mai ia le faamai i inei.

**Afioga Hon Fiamē Naomi Mataafa:** Ia lau afioga i le Fofoga Fetalai...

**FOFOGA FETALAI:** Ia se i tulai mai le afioga i le tamaitai Palemia...

**Afioga Hon Fiamē Naomi Mataafa:** O le mea e fia faasao, o le mea la lea e tupu pe a tatala tele ia le tatou talanoaga. Ia o lea ua tuuaia le vaalele, leai e le o le vaalele na aumaia le faamai, o tagata na aumaia le faamai, ma le faaaloalo.

**FOFOGA FETALAI:** Ia malo faafetai, e pau lava si mea lea ona o lea na taua e le sui usufono o Satupaitea faapea e le tau talitonu foi i le tali a Olo. Malilie o le afioga i le Minisita o le Minisita a le Malo filifilia.

O le mea la lea, e i ai le manatu e le tatau ona o tatou o i saunoaga faapea. O oe o le tasi sui usufono o le Palemene ia o tatou iloa foi ina ia faaaloalo ia tatou saunoaga, ma ia fai ma le mautinoa, o le afioga i le Minisita ae e le o le talitonu i ma e faia.

O le mea la lea, o le agaga lena o le Nofoa ia outou sui usufono mamalu. Se i tulai mai lau afioga i le Minisita o Pisinisi, Alamanuia ma Leipa.

**Tofa Hon LEATINUU WAYNE SOOIALO:** Ia faafetai lava i lau afioga i le Fofoga Fetalai i le tau faafoefoeina foi o le fonotaga i lenei taeao.

E momoli atu le faafetai tele i le sui usufono o Anoamaa 1. O fautuaga lelei ia na aumai ia aua le faufauina o la tatou galuega faavaitaimi. A mea o le agaga na na i ai, ina ia a manaomia mai loa ia ni aufaigaluega mai i fafo, ona vaevae lea i itumalo lea ua i ai ia o tatou itumalo lea ua i ai i le taimi nei, ina ia tutusa uma ia itumalo ina ia mafai ona o i fafo ia avanoa, ona o le taimi lenei o lo o filifili lava e le Matagaluega i profile a tagata o lo o talosaga. Na ave lea i fafo, piki mai e le kamupani lea e ona le galuega, toe aumai iinei toe fai atu ai, ae o le agaga lea e aumai i i, pe le mafai ona aumai i tua i itumalo, manaia.

A faapea e 2,000 lea e manaomia, vaevae uma i itumalo e 51, o loa laia o le komiti ma le latou ia fili mai ia le latou tagata, ina ia mafai ona ave i le galuega faavaitaimi lea ona maua ai lea o avanoa e itumalo e 51, e filifili ai e latou i tua. A uma ona aumai i aiaiga lea, ona aumai lea i i e vete e le Matagaluega ona fai ai lea o le process lea, ae e faauluulu ai foi le sui usufono ia ma latou o lo o i ai, ia mafai ona maua le avanoa lea, ia i lo le toatele o le isi nuu ae leai ni tagata o le isi nuu. Ae faafetai mo le fautuaga o lea ua aumai i le aso, ia i le tulaga lea. Ia e aoga foi ia le tatou faasoia e maua ai se malamalamaaga ia ma se fesoasoani foi a le Matagaluega aemaise foi o le taumafai atu o le Minisita.

Ia o le tulaga i le lipoti lau afioga, ia o le a taumafai lava ia le kamupani foi a le Samoa Airways ina ia update mai ia ana lipoti faaletausaga e aumai i totonu iinei. Mo le silafia e le tatou Palemene, ina ua o le faigamalo lea na tea nei e faatino uma ia mea ia, e le i aumaia se lipoti i totonu o le Palemene. Na fai lava i lo outou silafia, ma lo outou iloa, e aoga fuafuaga ia mo le atunuu. E le i aumaia i totonu i i nei e avatu ai se leo o le tatou Palemene. Na fai lava e outou ia i le tulaga sa outou silafia i lenei vaitaimi o lelei.

Ia o lea ua taunuu atu ia le Tamaitai Palemia ma lana faigamalo aemaise le Kapeneta, o lea ua o matou tilotilo e eseese ma le tou silasila. O le matou tilotilo e gau. A gau, e le mafai ona faaauau. O le tulaga la e i ai, e le tatau ona faaauauina, o se mea e gau.

O le tulaga foi i le fesili mai o le afioga i le Sui Taitai po o le a se...

**Afioga Alaiasa Moefaauouo Malagaitutogiai Sepulona Moananu:** Lau afioga i le Fofoga Fetalai...

**FOFOGA FETALAI:** Malie lau afioga i le Minisita, o le galuega faavaitaimi lea ua manaia lau fautuaga ua talia lelei e le afioga i le Minisita. Lau afioga i le sui usufono o Anoamaa Nu1, saunoa mai.

**Afioga Alaiasa Moefaauouo Malagaitutogiai Sepulona Moananu:** O lea ua manaia ia le saunoaga a le Minisita, ae e pei ua alualu lava toe faasea i lipoti. Ia ae o le matou talosaga lea sa fai atu, sa tuusao atu i lau afioga ona o sui usufono o le Palemene, e fia manaomia le lipoti.

Ae a tatou o i mea ia e faavae ai malo, o le aaccountability ma le transparency, aua le fiu e fai lipoti. O le tiute lena o tagata faigaluega fai mai lipoti pe a manaomia le lipoti. O le mea lea e fautua atu ai i lau afioga, o lea ua ou fai atu, ou te le o toe manaomia se lipoti. O lea ua ou malamalama. Ae e pei o lea ua toe tulai mai faasea mai e fuafua i le isi faigamalo, leai ua ese foi ia le faigamalo lea i le agai i luma. Ia ma le agaga faaaloalo.

**FOFOGA FETALAI:** Ia se i saunoa mai lau afioga i le Minisita.

**Tofa Hon LEATINUU WAYNE SOOIALO:** Faafetai i lau afioga i le Fofoga Fetalai. Ou te le o tali atu, o lea ua uma ona ou tali i lana lipoti e aumai faaletausagea. O lea ou te tali i le afioga ia Lautafi, i ni lipoti e tataua ona aumai. Ou te le o tali atu i lau afioga.

Ae malilie ia, o lea se i ou tali atu i le afioga ia Lauofo pe e i ai se isi fuafuaga a le Malo e toe aumai se isi vaalele. Se i fofo muamua le isi faafitauli, ona faatoa tatou o ai lea i se isi faafitauli, aua e le mafai ona o tatou o e toe aumai le isi vaalele, ae o lea e tau fai atu le fuafuaga o le isi vaalele.

Ae talitonu le agaga, a faapea e lelei i totonu o le 2 tausaga po o le 3 tausaga, ia e toe ave foi ia le tuualalo i le Kapeneta pe o le a se fuafuaga i ai, ia ua tataua ona aumai se vaalele, aumai se vaalele e le gau, aemaise se vaalele e lapoa atu ina ia mafai ona ave ai ma i'a, cargo aemaise ia transshipments lea i Amerika. Ona o le tele o tatou ia, e avatu ave i Amerika, pe ave i Iapani, tulaga faapena.

E le mafai la ona load i lalo o le belly o le tamai vaalele ia, leaga e avatu transfer ia container ia, i le isi vaalele ina ia less ai le handling. O le mea la lena, ia atonu pe te i ua oo atu i lena vaitaimi lau afioga, ia ua maua se tali o lau tuualalo ia aemaise foi o le faafesili. Ae o le a tilotilo lelei i se vaalele e mafai ona lele. Ia aua o le taimi lenei o lo o i ai ni nai faafitauli i le PASO, ona e silafia, ia ae o lea e tatou galulue foi ma le PASO. Ia a faapea sa galulue faatasi ma outou, o lea foi e galulue faatasi ma le Minisita, ia o le tulaga lava lea e i ai lau afioga.

Ia ae o le toe tali atu lea lau afioga i le Fofoga Fetalai. Ia e talitonu ua faamalieina, a le faamalieina foi, ia o lea lava e tatou te fetau lava iinei, ia aumai ai foi se fuafuaga ma se tuualalo.

Ia ae o lenei itula, ia avea ia lenei itula e momoli atu ai le faafetai tele i le Matagaluega e i lalo o lenei vaega maoti, ia e 9 ia Matagaluega. Ia faafetai atu lava i afioga i Ofisa Sili aemaise lava e o lo o lagolago mai i lenei galuega faigata. Ia e le faigofie, e i ai lava ia faafitauli, ia masalo e leai ni faafitauli o latou o i ai i lenei taimi, ia ae ou te iloa o lo o nonofo lava ia le Maota nei, ia ma nisi faafitauli o lo o agai mai. Faafetai mo galuega ia ma galuega mautu.

Ia avea ia lenei itula ou te afe atu ai i lou itumalo lau afioga, e momoli atu ai le faafetai tele i le matou itumalo Faleata 2. Susu ai Siliga ma Sa Siliga, ia le Tofa ia Nuu ma Leatinuu ia aemaise le mamalu o si o matou aiga i Vailoa. Susu foi le Alo o Malietoa, lo matou nuu i Vaiusu, ia le faaafio o Alii ia faapea foi ia le fetalaiga ia Ulugia ma Ulugia o latou o lo o tautuaina le itumalo, ia ae faapena foi si ou nuu i Vaigaga, o lo o i ai le Susuga ia Papalii ia afio foi Sooialo o le tama tau Lepea, ia puipui iai Puaalatamai ma Puaasegisegi. Ia aemaise ia nuu paia o le pito i tua o lo matou itumalo, ia atonu e leai ni tatou faalupega ia o faalupega uma lava o Faleata e tatou te o ai.

Ia aemaise Susuga i Faafeagaiga ma aulotu taitasi o lo o tautuaina le upufolafola a le Atua, ia aua se manuia o le tatou itumalo. Toaga pea e tatalo, tatalo mai mo le faigamalo, tatalo mai mo au, tatalo foi mo le la foi itu ina ia maua ai ia o tatou manuia lau afioga i le Fofoga Fetalai.

Ia o se faamatalaga lea ia manuia lava fuafuaga o totoe o le Fono i lenei aso, Viia le Atua, faafetai.

**FOFOGA FETALAI:** Faamalo faafetai i le afioga i le Minisita o Pisinisi Alamanuia ma Leipa. E talitonu foi o lea ua faafogafoga ma le totoa le paia o le Maota i le tolaulauga foi ma le faaaliga foi aemaise foi o mea sa faaaliga e sui usufono mamalu o le Palemene, ia ou te talitonu ua malamalama mea uma.

O le mea lea, faafetai e tele lava le galuega ia ae o lea ua e taumafai e auiliili vaega uma ia aua le faafogaaga a le Maota, ia aemaise foi o le tatou atunuu. O le mea lea, malo faafetai. Ou te talitonu foi, o lea ua malamalama foi le atunuu i lenei vaitaimi aemaise o le tau o le soifuaga, aemaise foi o galuega faavaitaimi, CT Scan ma vaega uma. O le mea lea malo faafetai, faafetai foi i le faaopoopoga a le afioga i le Palemia, ia e le o nofoai lava ia le Kapeneta, mo le silasila mamao ia aua le manuia lautele o le atunuu.

O le mea lea faafetai mo le saunoaga. Ia o le taimi lenei ua oo atu i lau afioga i le Minisita o le Soifua Maloloina, tulai mai mo lou avanoa.

**Afioga Hon VALASI LUAPITOFANUA TOOGAMAGA TAFITO SELESELE (Minisita mo le Soifua Maloloina):** Lau afioga i le Fofoga Fetalai, le mamalu o le Maota Fono o Samoa, e i ai le talitonuga, sa tomanatu lava pe fai se tala a le Minisita a le Soifua Maloloina pe leai aua o lea e vaavaai atu i le Tala o le Tupe faasoa i ai le sa o le tatou Maota nei, ia e le o i ai se vaegatupe mo le Soifua Maloloina. Ui o lea, e le avea le leai o se tupe, e tuu ai se tala a le Matagaluega leaga e tele le mea ua tulai mai, ia pe ou te taua foi ia vaega na taua e sui usufono pe leai, ou te iloa o lo outou malamalama.

E manino le Tala Autu o le Tupe o lo o tuuina mai. Ui o lea, e le faatauagavale lou tagata i le tulai mai o mataupu sa laga, aemaise ia tulaga e pei ona i ai ia le tatou Fonotaga.

Lau afioga i le toeaina matua, Minisita Lagolago Tea Peato, aemaise ia le CEO o le Matagaluega le Susuga ia Leausa, ia po o le afioga foi ia Toleafoa, ia o lea foi ua faaee i ai le Suafa Seuamuli. E le gata i lea, o le Pule o le... e leai lava se sui usufono sa taua le Faamamatoto. A o lo o i lalo o le vaaiga a le Minisita, ia po o le National Kidney Foundation, ia aemaise foi o le Iunivesite... O le Faamamatoto e i lalo o le Pulega a le Susuga ia Mulipola Hazelman ia aemaise foi o le board.

E le gata i lea o le susuga i le alii fomai ia Toleafoa Dr. Viali le Iunivesite a le tatou Matagaluega o lo o i lalo o lana Pulega. O vaega ia e tolu o lo o i lalo o le Soifua Maloloina po o le Minisita, ia tapuai maia ma le manuia, se i sii le sa i tai ia aua foi ia se tatou sao i le Fonousu a le Palemene.

E amata sau lauga lau afioga i le Fofoga Fetalai i le tausailia o lauga aua le Maota ma le malae lenei. Fai mai le tala, sa tu le tootoo o Namulauulu Lauaki se isi toeaina o lou itumalo tautaua lau afioga i le Fofoga Fetalai, tautaua ona tala i le malae o Fagaloa se i sufi le tofa, ina ia au ia Malietoa i le taua sa... E tu le tootoo o Namulauulu ae punou Malietoa ma vele le malae. O le velega malae lea a Malietoa, na aumai ai le agaga o le atu Fagaloa ma au ia ia le taua. O le tala masani.

O lou talitonuga i velevelega malae a lena Itu o le Maota, itumalo e fia, a lea ua maua lauga o le Maota e ala i lena itu. Sa velevele malae le Palemia i lena vaitau, le Sao Faapito aemaise foi le itu FAST, a lea ua i ai sui usufono o le Maota lenei. O le ala lea o lou faapea atu e le faigofie le filifiliga. E le faigofie ia Samoa le filifiliga o ona sui usufono aua le Maota o Samoa. O le velevelega malae sa o tatou faia i so o se itumalo so o se nuu e sufi le tofa lea ua aumai le tali faaaliali a Samoa, ia o lea ua tulai atu lenei itu e fai le Malo aemaise o le tatou Malo i lenei vaitau.

Fai mai le tala e vaavaai atu ua savali ane le tausala ma le fala, le tootoo ma le fue e fola i malae. Fai mai le tala a Faletele, siaula, o le a lea mea o le a fai? Fai mai le tali a le tamaitai, o lo o tausaili se lauga a le malae. Na fesili le faletele i le faleoo fesili le faleoo i le faletautua, fesili le faletautua i le

falegasese, apaapa le falegasese i le vao ma le gataifale, toe lipoti mai lea. Ua logo le falegasese, faletautua, faleoo ma le faletele, ua maua le lauga.

A lea, ua maua le lauga o le Maota, o lea ua i ai le Fofoga Fetalai, e faafoeina le Palemene o Samoa. Ua maua lauga o itumalo eseese, o lea ua i ai lo outou soifua a outou afioga aemaise foi le mamalu, o lea ua fai ma sui usufono o itumalo aua o lauga sa fili e le tofa ma le faautaga.

Fai mai le tala ina ua tofia Malietoa ma Tamasese i Ao Soofaatasi, ona talanoa lea o Tamasese ma Malietoa, faapea atu le isi i le isi, e le o se pule na aumai ia taua, o le faatuatuaga o Samoa. O le a le mea e ta te tuu i le faatuatuaga, faaopopo i ai le faamaoni ma le amiotonu. A le faamaoni ma le amiotonu, o ia Ao Soofaatasi i na vaitau, ua maua ai ao o Samoa. O lea ua aeae ai ia Samoa i onaponei.

Lau afioga i le Fofoga Fetalai fai mai le fofoga po o le tuleiga a ia tamalii tautaua po o Tamaaiga po o tumutumuga o Tupu o le atunuu, e le o se pule na aumai e Samoa. O le faatuatuaga, faatietie i ai ma le amiotonu, ma le faamaoni e pule ai le atunuu. E faapena se lagona o le sui usufono lenei. E le o se pule na aumai ia tatou, o le faatuatuaga o Samoa e ala i itumalo eseese, na to mai ai le faatuatuaga aua le Maota.

Lau afioga i le Fofoga Fetalai, o lenei vaitau e le fesiligia mafatiaga o Samoa. O le ala lea o le tulai atu e fai se leo. Fai mai le tala, e i ai se tagata tautaua se philosopher, sa nofo i le Malo o Peretania o lana galuega o le faafoia o faafitauli i so o se auala. O le suafa o lea tagata o Mataio Maila pe o Mathew Mile. Nofo lea o lea tagata ma fau le lio ma faaigoa i lona igoa o Miles Cycle of Learning, o le lio o Aoaoga a Maila.

E faapuupuu sau tala, fai mai suesuega a lea tagata atamai, e tolu lava mea e oo i le tagata soifua, pe a feagai ma faafitauli o le olaga. Muamua e feagai loa le tagata ma faafitauli, o le mea muamua lava o le pepelo, tautuuai ma tusitusi le lima. O Simi o Lafai o ai na mafua ai. Fai mai le tala a lea tamaloa atamai, o le isi vaega, e feagai ma le tagata soifua pe a tulai mai faafitauli, o le lafi ma le faafitauli pe o le sola ese ma faafitauli. Ae fai mai ia le vaega lona tolu ma ou te talitonu o le lui lea mo le tatou Palemene, aua tatou te pepelo pe tatou te tusitusilima pe tautuuai. Aua tatou te lafi pe solaese mai le faafitauli. Ae fai mai le tamaloa, galue le faafitauli semeamanu o laitiiti.

O le fautuaga lena le tatou atunuu, aemaise ia le tatou Palemene. Ua tele tala ua alu, tele faamatalaga fekolosiai, i luga o api foliga, ua tuuaia le Matagaluega o le Soifua Maloloina, ua tuuaia le Minisita, ua tuuaia le Malo. O le tala a lea tagata atamai, aua tatou te tusitusilima, aua e tatou te tuuaia se tasi, tatou galueina le faafitauli.

Lau afioga i le fofoga Fetalai ma le mamalu o le Maota, i le taimi na i ai le faasalalaua a le Palemia i le Maota lenei, na maligi ou loimata ma faasaga i luga lau vaai, ootia le loto, mafua i se a? O alo ma fanau a Samoa, feagai ma le puipuiga o le Koviti mai i le lua tausaga lea ua ova ma le lua tausaga, Talofa. Si tamai taimi e sasi ai, ua tuufesili ma tusitusilima ae galo le galuega

tele. O le galuega e le moe, e le malolo, e sautia, laina. O le a le mea ua tulai mai, talofa. O lau fautuaga i lau Matagaluega ina ua talai mai faafitauli nei, ou te faamalosi, to'a le tai, ia maua le lototele, tatou faatuatua i le Atua. O Ia e aumai le tali, e leai se pototo e leai se atamai e sili atu i le Atua.

Lau Afioga i le Fofoga Fetalai, e avane Samoa o si tamai atunuu, ma atunuu tetele e i ai le aupopoto ma atamamai, e oo mai lava i le aso e le i foia lena faafitauli o le faamai, pe i ai se fofo.

Lau Afioga i le Fofoga Fetalai ma le mamalu o le Maota, e le alo le lauga i se ata o le laau, ou te lagona le mafatia o le afaina o loto o alo o Samoa. O lo o galue i le po ma le ao aua le taumafaiga o le faamai. E le faigofie, e le faigofie. O le ala lea lau Afioga i le Fofoga Fetalai ma le mamalu o lenei Maota. O lau tatalo aua tatou te tusitusilima, aua tatou te tau tuuai, tatou punou ifo ma galue le faafitauli. O le ala lena o le fili o le tofa, fili lauga o le Maota lenei. O taitai e le te i gofie, o taitai e le lagalaga pe a tulai mai faafitauli. O i e afua atu ai le filemu o Samoa, o i e afua atu ai le manuia o Samoa. O le ala lea o le faatomua o lau tala, e le i soona filifilia taitai o le Maota lenei.

O le ala lea o lou tulai atu lau afioga, talofa e le gata i lea a o Ofisa Sili o Pulega o Matagaluega sa tofia, e lena itu, i lena Faigamalo talu ai, ina ia lipoiina Komiti o Faalavelave Faafuasei o le NEOC. O lea lava e lagolago i ai le Palemia ma le Malo. O lo o faatuatuaina le latou fautuaga ma le latou tuualalo, o lea lava e mulimulitai e le Faigamalo lenei. Ae talofa, toeitiiti leai se aso ma se taimi. A ta moe i le po, ta te tatalo. Ua felautoai ma tele manatu ma aumai lagona ma aumai manatu o tagata popoto ma atamamai o Samoa. O lau tala ma lau lui, a atamai le Samoa, fai le fofo o le faafitauli, fesoasoani i le Matagaluega o le Soifua Maloloina, fesoasoani i le NEOC, faufautua i ai. O lea foi e faafofoga Samoa o le atunuu e sili ona faigofie, e oo i ekalesia i faaululuga. O le taimi lenei e galulue faatasi uma Samoa. O lou talitonuga e le alo se tala i le ata o le laau, e le i lava tapena Samoa mo le faamai.

Ou te taunuu mai i totonu i le 6 masina lea ua i ai. O le tala e le natia, e le fia mama, a oo mai le faamai ae fufulu faafuasei lo tatou atunuu. O ai e tuuaina? A o lau tatalo lena i lena Itu ma lenei Itu, tatou tauave faatasi le galulue faatasi i le moni ma le faamaoni, aemaise o tatou Taitai faale-Ekalesia. O le tatou atunuu, e faatupu loa se mea, e pei o le opogi o le a. E i ai le tatalo, e oo foi i o tatou nuu i tua, ua tataua ona tapena. O le piliota lenei, o le avanoa lenei e tapena ai o tatou tagata. Aua ne i faatalitali, aua ne i faatalitali. Ia tapena, o nuu i tua e tasi lava upu a toeaia, faaavanoa falekomiti, faaavanoa fale o faifeau aua e te fiu e tau sue se isi vave, e pei o le emo o le mata. O le talitonuga lena.

O le ala lea, faafofoga a lenei Maota mamalu, o le ala lea o le fia faaleo o se lagona. Afai e afaina alo ma fanau a Samoa i upu ma tala ma tuuaiga, o ai e sa'i i ai? E sa'i lava i alo ma fanau a lo tatou atunuu. O fanau i ina, o fanau iinei.

Talofa i susuga i fomai, tausi soifua, leoleo, sikulaki, o i latou o lo o faafoeina ma feiloai ma le oti i taimi uma pe a fai o lea. O ai se o tatou i le Maota lenei e ofo mai, e alu e tu muamua i luma e tali le oti. Ailoga e i ai. O le ala lea, o lau tatalo i lenei taeao, lo tatou atunuu aemaise o tatou o taitai o Samoa, aua tatou te tusitusilima. Aua tatou te te i gofie ae ia tatou soalaupule ma fesoasoani, tuualalo. E po o le a lou poto po o le a lou atamai e le toe aoga i le taimi nei. O le tagata poto e sau e aumai lana fesoasoani e tuualalo i fomai, e tuualalo i tausi soifua, e tuualalo ia i tatou uma, e faapea ona fai le mea lea. E le o moe ma tofa le Palemia talu ona tupu le mea lenei. O le mea moni, matou te fono, o lo o molimau le NEOC, taimi uma e valaau atu ai, tatou fono o le a le taimi lea. E faalua, e faafia ona fono, e taumafai, e leai se isi o faatalale ia Samoa. E manumanu ia Samoa.

O le ala lea o lou tulai atu lau afioga i le Fofoga Fetalai, o sau tala lena. E le o i ai ni mea o aafia ai le Soifua Maloloina i le Tala o le tupe. O mea uma ua uma ona faamaumau. E 25 sui usufono na sausaunoa, 26 i le Taitaifono o le Komiti. Ou te le o taea saunoaga a Minisita. E ese lou faafetai i lauga a le Maota. O lou Minisita o lou fiafia ia e tali tuuaiga, leaga e aoao mai ai au mo nei ma taeao. E lelei le tau mai o le faaletonu, ona galue lea i ai. O saunoaga uma ia na saunoa i le Maota, o tuualalo. O lea ou te faafetai i sui usufono mamalu. E fou nisi o sui usufono, a o taitai na filifili mo le Maota lenei, o lauga o itumalo, e momoli le agaga faafetai. O le a ou le taua outou suafa, ae ou te faafetai i la outou tuualalo, e ese le matagofie.

O mea uma i totonu o le falemai, o masini o le vaaiga o mea uma, tulaga e pei ona faailoa mai, ua uma ona... e le gata i lau tusitusi, ae ua leva ona silafia o lea e faamaumau e lau CEO aemaise o i latou o le Pulega o le Falemai i so o se taimi. E pau lava le mea ou te fia oo i ai, e tasi lea auala ua fesoasoani malosi i le vaitau lenei. O falemai ua oo atu i ai taavale e ave ai gasegase. Ua tofu falemai, o galuega sa faataoto mai, o lea foi e alala mai le Minisita o Faimalo. Ua faataunuuina ma ua faasoa i le lelei. E leai se falemai i nuu i tua i Salafai e leai se taavale avemai.

Ua i ai falemai ua tuuina atu i ai ni taavale, e fesoasoani i le aufaigaluega, ua faafou. E tasi lena galuega ua uma ona tuualalo i le taitai po o le Ofisa Sili o Pulega o le Matagaluega, ia faalelei auala e feoai ai tagata galulue. Aua e tasi lea mea sa matauina, e i ai falemai ou te alu atu e tulei le taavale, se i tulou. E tu i le matie, lau Afioga i le sui usufono mo Anoamaa, o le Aso Tofi nei e oo atu ai lau taavale fou i lou falemai. O lea ua tau atu, leaga o lea ua atoa ai i i, ia tulaga o falemai.

**FOFOGA FETALAI:** E leai se manatu e faalavelave i le saunoaga matagofie a lau Afioga i le Minisita. Ae matau atu o lea ua e taua le suafa o Faimalo. Tulai mai lau Afioga i le sui usufono mamalu.



**Tofa Hon Faimalotoa Kika Stowers Ah-Kau (Gagaifomauga 1):** E faafetai tele i lau Afioga i le Fofoga Fetalai mo le avanoa o lenei usugafono. E leai se agaga e faalavelave i le saunoaga matagofie i lenei taeao a le afioga i le Minisita o le Soifua Maloloina. Ae le i aveina atu se faamatalaga lau afioga i le Fofoga Fetalai, e ui uma ai faamatalaga e agai i mea o le a e tautalagia.

E leai se agaga, o le mea lea e momoli atu ai lau faafetai. Na ou sau ananafi, ona o le tele o valaau na omai, o le a ea le mea o tupu? O le a le matou mea a fai? E faapefea ona matou fesoasoani atu. Ona ou nofo lea i le weekend atoa ma ou faalogologo, ma ou tatalo. Talofa e i o tatou tagata o la e fia faalogo mai. Ona ou sau lea ma lou vaivaiga ananafi. E tau atu pea, o le a ou tago e faatu se lafo, e pasia le Tala o le tupe lea, ae aumai le tatou faamuamua, e talanoa muamua le faafitauli lea, o la e taliga mai. Ou te talitonu e leai ma se itumalo, leai ma nisi o toe faasea, ae o lo o fia faafogafoga mai, o le a le tatou gaoioiga, a o le a le tatou polokalame. O le fesili la e aumai. How can we help? O le a se matou mea matou te fesoasoani atu ai? O le lagona lena o le tatou atunuu i te i ua faapea, ai ua ou faalavelave atu. E faafetai i lau afioga i le Minisita, ua e saunoa tonu lava i le mea na ou nofonofu ma au, tatou galueaina muamua le faafitauli lea.

Ona i ai lea o sou vaivaiga, tuu atu pea, e ui lava ina tele faamatalaga na fai i le seleni lea e \$200,000 lea. E leaga o le afa o lau lauga i le vaiaso lea i le Aso Tofi, ae le i tupu le mea lea, e le i iloa le faafitauli ua oo mai le faamai. E faafetai foi i lou talia o lou momoe i Savaii e tuli le vaa moe i le Aso Tofi ina ua uma la ta lauga, ona o le maliu foi o se tasi o toe Ulutaia o le matou itumalo, ma le matou aiga. Ae ua ou manatu ai i le tatou Komiti ia, ou te talitonu, na ona fai mai ua uma ona lesitala le 10...ou te iloa o la ua uma ona lesitala le isi 20. E leai se itumalo e le i tofiga le latou Komiti.

E pei ona ou molimau atu, o le Matagaluega lea sa ou taumafai e uunai, leaga o lea na ou vaai ma ou tilotilo, ma ou molimauina e le o lava resources, e le o lava le aufaigaluega o fomai tausii soifua. E le o lava nofoaga avanoa, o le tele o mea e le o lava, o lena lea na avatu ai sau fautuaga, sa tatau ona ave i ai se seleni feoloolo e fesoasoani i mea e le o lava ona fai.

Ona i ai lea o sou manatu, pe afai e tau ane ai, a leai toe faafoi mai ia Faimalo lona vaivaiga. E 14 au komiti, 15 i le sui usufono e Taitaifono 16 i le sui tamaitai, 17 i le pulenuu. O le 17 lea e mafai ona fesoasoani mai, o lea ua aafia uma ai le atunuu e 51 itumalo. Ia fesoasoani mai i lalo o le vaauga a alii ma faipule o le itumalo. Ae o e taamilo latou te iloa uma aiga, e fia outou tagata e le i tuia, aumai le lipoti, fai le faasalaga a alii ma faipule. O le vave ia ona pick up le tatou mea lea tatou te popole nei i ai, ae sau i tua i le community. O le tele o le avanoa. A faapea la, aua o lea ou te faalogo atu e toatolu tagata e mann ina le ofisa. A faaopoopo la i ai ma le 3 i se taimi e talafeagai ai, ua 20 mai le itumalo e mafai ona fesoasoani i le galuega a le Ofisa o le Soifua Maloloina. E faafetai i le aufaigaluega uma lava o lo o

galulue, faafetai i le Komiti a le NEOC, faafetai i lau Afioga i le Minisita, Ofisa Sili o le Pulega o le Matagaluega ma le Pulega ma le aufaigaluega atoa, e saolele lau saunoaga.

E mai lou foi taimi, ou te vaai ma le momomo o le loto e le malolo, e le lava le moe. O isi taimi o la e faafofoga mai Leausa, ma te talanoa, ou te fai atu, se i afio mai lava se i e brief maia po o le a tonu lava le pepa lea, a o le... e alu alu lava, ou te tau popole i le soifua o le aufaigaluega, e vave ona aafia ona o le le lava o le malolo. O lea e avatu ai lau tuualalo, lau afioga, o le a avatu sao lau tala, o le a le mea e le toe liuliu ai se tofa, pe afai e talia se talosaga. E tofogi alauni o tagata nei, ae omai tatou o e fai faatasi le galuega, e mautinoa ai o tagata lava o lo ta itumalo e o e fai ma le faamaoni. Ia update le data lea po o ai e le i tuia, e toafia le vaega lea e le i tuia mai le 16 i le fia...o le a le booster. O lea ua ou faalogo ua aumai le 10,000 i le vaiaso ea lea, pe ua maea ona fai frontliners ae po o ai lea o le a sosoo. E pei o se vaivaiga faapena o lea ou te fesoasoani atu ai, pe a fai e talia se tuualalo.

**FOFOGA FETALAI:** O lea ua maua lelei le tuualalo. O lau Afioga i le sui usufono mo Gagaifomauga Nu 1. O le foi sa avea ma Minisita o le Soifua Maloloina, o lea ua faafogafoga atu ma le totoa le Minisita o le Soifua Maloloina mo fautuaga ua tuuina mai.

Se i tulai mai le sui usufono mo Anoamaa Nu 1.

**Afioga Alaiasa Moefaauouo Malagaitutogiai Sepulona Moananu:** O lea ua saunoa le Minisita ua lata mai se aso e faamanuia ai foi lenei itumalo i faamanuiaga e pei o le taavale.

E momoli atu le agaga faafetai, o le tele o le lauga a le Minisita, e pei e faasaga mai ia maua ma Peseta. O lea e lauga mai ia maua le Minisita, ae usi lava faavaa o savili le faafofoga a le Maota i le matagofie o le folasaga a le Minisita, e galulue faatasi.

E fai lau lauga lea na uma nei i le tatou Tala o le Tupe, e le i oo mai le faamai. O lea la e pau lava lau tuualalo, e tautuana le puipuiga o i tatou. Ae manaia o lenei faamai, e faaigoa, Covid-19, e le se faamai foi lea, e i ai lava le tausaga na tupu ai le faamai. O lea la ua oo mai i nei i le 2022, o lea ua oo mai ia i tatou. Ae o le agaga lava lea na tuu atu, mai isi Palemene ua tuanai atu. Ia tautuana, ia puipui ia tatou mea ia. O lea la ua tautino le solo a le tamaloa. E le taitai ona gafatia e lo tatou malosi lea e i ai, e tatou te tali atu ai. E pau lava le mea lau Afioga i le Minisita. O au ou te fiafia e matamata i taaloga tetele ia e sau mai atunuu mamao. Na ou matamata la i le atunuu lea o Amerika, i tulaga...o le tasi lenei o atunuu, e pitosili ona malosi le faamai lea e i ai. Ae ou te vaai atu, e matua faatumulia ia stratum tetele i taaloga o lo o fai nei, o taaloga football a Amerika.

Ia te au lava ia, o le faaaliga lea o le faatuatua, e faafetai o lea ua uma tui ia e lua. O le isi mea e fautua atu i lau Afioga, na on toe alu lava o le tatou booster, tatala loa ma le mea, ma le faaaloalo lau Afioga.

**FOFOGA FETALAI:** Mo le faasaoina o lau Afioga i le Minisita, tulai mai lau Afioga i le sui usufono mo Faasaleleaga Nu 5, ona sosoo mai lea ma le sui usufono mo le Vaa o Fonoti.

**Afioga Peseta Vaifou Tevagaena (Faasaleleaga 5):** E faafetai i lau Afioga i le Fofoga Fetalai, ua ou tulai atu leaga o lea ua oo tonu i le mataupu lea sa ou lauga ai. O le tulaga i le taavale a falemai i si o matou...po o le tatou motu i Puleono i Salafai i Tuasivi. O lea e matau atu lau Afioga i le Minisita, a o lau afioga foi e mai Puleono. Ua matau atu i lenei itula o le aso, o lea ua faaituau le taavale e ave i si ou uso, ai o le mea lea e te tilotilo mai ai ia maua.

Ae o le tele o lau lauga na agai atu talosaga i lau afioga. O le tulaga foi lea o le lava o tatou taavale ia e felauai ai tatou mai. Silasila foi lau afioga i le avatuga o lau lauga i Salafai i le vaa muamua, e na ona omai lava tuu i Leulumoega ae toe foi le taavale i le vaa. E mafua i se a? E le lava taavale. Atonu foi ua toatele nisi foi o le atunuu ua maumau soifua, ua tuai.

O le ala lea na avatu ai le tuualalo, se i toe silasila ifo i le tulaga lea. E tataua ona tilotilo pe le tataua ona toe faaopoopo nisi taavale i Tuasivi, a ua sau lava le taavale e aumai le gasegase, aua le toe afe i Leulumoega, ia tuusao lava i Motootua. Aua e leai se aoga e aumai ai i inei, ae uma le soifua i Leulumoega. Ma lou faaaloalo lava.

**FOFOGA FETALAI:** Mo le faasaoina o le taimi, o lo o i ai le sui usufono.... ia tulai mai lau afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** E manaia le faauilavea ma le faamaumau taimi o Peseta. O le agaga sili ona taua o lea ua e taua, leaga e te lauga mai i le taimi lea, e te le i silafia ua soo Savaii, soo Upolu i taavale ave gasegase. O le ala lea ou te fautuaina, taumafai ma e asiasi ma afe i Tuasivi. Aua le fau loa lauga, oo mai loa i i, faalauiloa. Ae alu e asiasi ua soo Savaii, o le mea foi lea ua i ai le falemai a tatou i Salafai, e aumai sao lava lana mai i Apia. E le toe faatalia, na ala ona fua se mea faapena i ia vaitau, ona o le utiuti. A sau e vave alu le taavale e tuli le vaa, ona faaauau mai lea, ae ia avea Leulumoega e pei o se centre. E leaga ona umi o le sau a le taavale, ae sue atu i Apia ua oti, sei tulou. E afe muamua i ina, o le mea lena e le tutusa ai taua Peseta. O le mea e tau o le tofa mamao, e vaavaai aua ne i umi ona ave le mai, ae afe i le isi falemai muamua, e fai ai togafiti.

**FOFOGA FETALAI:** Ou te ofo o lea ua manino le saunoaga i le Afioga i le Minisita. Ia tulai mai lau Afioga.

**Afioga Peseta Vaifou Tevagaena:** Ia silasila foi lau Afioga i le Fofoga Fetalai, o lau afioga ma au, ta te omai i le itumalo e Faasaleleaga, e na o mea lelei lava e avatu. Ae o lea ua saunoa le Afioga i le Minisita i le tulaga lea, ia faafetai o lea ua e usitai i le mea na ou fai atu ai, ia tuusao le mai i o i Motootua, aua le toe afe i Leulumoega. Ae ia e alofa lau afioga, toe avatu nisi taavale e le o lava taavale i Tuasivi. Ma lou faaaloalo.

**Afioga Hon VALASI LUAPITOFANUA TOOGAMAGA TAFITO SELESELE:** O le fuafuaga lena a le Matagaluega aemaise le Malo. Ia vaavaai totoa i faafitauli ia, i le tulaga o le faasoasoina o auala.

E i ai falemai e tatau ona ave i ai taavale nei, ia fesoasoani, aemaise o lea ua fesoasoani tonu lava i vaitau nei o faigata. O Falealili o Lalomanu, a o lea foi o le a faaoo atu le sa i le tatou falemai i Lufilufi aemaise o Salafai. O lea ua faafofoga mai le sui usufono o Satupaitea e faapena. E faapena i lo outou tali mai, e ese le manaia o le oo atu o la e aloaia, o se meaalofa, aemaise o tulaga. Aua e i ai ituaiga uiga foi o nisi, fai mai e manao le Minisita e alu atu ona tai lea o sana sua. Se o mea faatauvaa mea na. O le fefaasagaiga o matai o le atunuu, aemaise o le momoli atu o se meaalofa aloaia e le tau atu i ni tamaiti. Ae ou te faafetai i itumalo, i le tali valaau. Aemaise le itumalo o Aleipata, sa ma faatasi ma le sui usufono, faafetai tele i le susuga i le tofi, le sui usufono o Aleipata Itupa i Luga, ma Lalo. E ui ina le faatasi atu le susuga ia Faleomavaega, ae ua lava lava le sui mamalu aemaise tulaga e pei ona i ai. Aemaise foi o Falealili, o Saanapu, e pau lea o le itumalo, e le i i ai se faipule. Ae ou te faafetai ia Leana sa i ai lona faatuatuga. Sa momoli atu ona alofaaga ia te au, ae o le mea taua o le tino, aemaise o tulaga uma, e le taua tele lava. Ae pau o le mea, o lea ua ou tau atu.

O mataupu uma lava sa laga, lea sa talanoa i le CT scanner, o lea ua ma galulue faatasi ma le Minisita o le ACC.

**FOFOGA FETALAI:** Ia malie lau Afioga i le Minisita, se i tuu atu le avanoa i le sui usufono mamalu o Safata Nu 1.

**Afioga Leana Ronnie Posini (Safata 1):** E faafetai tele i lau afioga i le Fofoga Fetalai. E faafetai tele i lau Afioga i le Minisita, e leai lava se lagona e faalavelave i le saunoaga. Ae o le mea mautinoa foi matou te au i lau saunoaga i le puipuiga o le faamai. E le aveesea ai foi lo matou lagolago, leaga o le vaitau lenei, o le vaitau tatou te tutu faatasi ai.

Ae manatua foi lau Afioga sa ou fesiligia lau afioga i le tulaga lea o le faamai. E pau lea o lau autilo ua tatou iloa uma, e le gafatia e le tatou malo pe a oo mai le faamai. O le mea foi lena o lea sa fai ai e le faigamalo talu ai,

ia ave le faamuamua i le puipuiga. Aua i lau matau atu i le faafitauli, na omai lava le malaga lea a le vaalele e toasefulu. O lea foi na maua na maua lava i le aso lea. A o lau fautuaga, a fai e le o atoatoa le sailiiliga o tatou tagata ia e malaga mai fafo. Ia tautuana ma lau afioga i le Minisita ia le va i fafo, ia matua saili lelei ia puipuiga ia, a o le i ulufale mai totonu o lo tatou atunuu.

E i ai lava le popolega aua o lea ua uma ona matou faalogologo atu i na i tausi soifua ia e toalima ua aafia. O lea foi e manino i le matou faalogologo e le o i ai ni auga o aliae mai, ona ua uma ona fai latou tui. Ae o le popolega lena pe a fai ua agai i tua le faamai. O lona uiga e le o aliae mai i tagata ni auga o le faamai, ae o la ua amata ona pipisi le faamai ona ua maea tui.

O lou popolega, o tatou tina ma tama matutua, o alo ma fanau laiti, ae o lea ua faalogologo atu i fautuaga a isi sui usufono, e tatala loa le omai. O au ou te ofo pe a fai e...e leaga o au la e ola ou matua. E i ai foi fanau iti, aua tatou te vaavaai i lo tatou malosia lea e i ai, ae tatou vaavaai i o tatou matua. O tagata matutua na ala mai ai manuia ma tatou saofafai i totonu o le Palemene lenei.

Lau afioga o lea ua e taua le tulaga o le taavale lea. E faafetai tele lava i lau Afioga. A fai ou te le i auai i le aso lea ona o nisi foi o Fonotaga taua, ae faafetai tele o lea ua e faataunuuna fuafuaga uma a lo tatou Malo na faataatitia atu. O le agaga lea ma le faaaloalo.

**FOFOGA FETALAI:** Tulai mai lau Afioga i le Minista. O si mea lava lea lau Afioga i le Minisita, e leaga o lea ua taua e le sui usufono, e faapea o lea ua agai i tua le faamai, ina ia faapopoleina ai le atunuu. E faamolemole i sau saunoaga e faamanino le tulaga lea lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** E faafetai i lau Afioga i le Fofoga Fetalai. O le agaga sili lea ona taua, e ese lou fialia, e le mafai ona tali aaina finagalo, leaga a tatou feteenai i o tatou manatu, e leai foi se tatou malamalama. E faafetai i le sui usufono, ae pau lava se mea sa fia malamalama ai, e faamalamalama i le sui ona o le aso lea sa fesili mai ai. E fesili mai le sui usufono, ua leva ona ou iloa ia tagata aafia. Na ou iloa i le taeao po o le ta o le 5. Ae le mafai ona ou soona faasalalauina ia issues, e i ai le Taitai o le Malo, o lea foi sa tapa i lena aso ia le Komiti o le NEOC ia aumai se lipoti manino. Ae le o le sau lava o le tala oso loa. Ona e tasi lava le auala o mea, e na o le Palemia. O le ala lea sa taofiofi, e masalo a na o se isi Minisita e pa oso loa, faasalalau. A o lau tala lea lau Afioga, e faaaloalo tele lou Minisita, i le Taitai leaga o ia e faasauina le...leaga o lea e i ai lo matou talitonuga, ia tasi lava le auala e faailoa ai mea i le atunuu. Aua o le tele ia o tala mai tua, ae a avatu lava le fofoga o le Malo ona talitonu foi lea.

A o le faasaoga o le mea lea, e leai aua tou te.... O le tagata e faapea a na faamatalaga, e malosi le vaavaai i le api o foliga. O nisi mea e i ai tagata e faasalalauina tala sese. O le mea moni o lo o toa Samoa, o lo o toa mea uma. O lea foi sa talatalanoa ma le CEO, ma le Matagaluega, e leai se mea o afaina, e na o le lio i totonu, o lea lava e tupu ai mea ia, o lea sa faalauiloa atu. Lau Afioga i le Fofoga Fetalai....

**FOFOGA FETALAI:** Se i onosai mai lau Afioga. O le a lau mea lea, e toe faasao lau lauga lena ua salalau i tua.

**Afioga Leaana Ronnie Posini:** E manino lava lau tala lea na fai, o le tatou agai i luma, pe a fai o lea ua tatou iloa e le o i ai ni aafiaga na vaaia i tausi soifua ia. Ae a fai e agai i tua le faamai, o lona uiga e faigata ona tatou maua.

E tasi lava le mea na fia malamalama i ai lau Afioga, aua o le aso 19 lea na sau ai le vaalele lea, ae faatoa fai le tatou lockdown i le aso Toonai, aso 22. O lau faafesili pe i ai se mafuaaga na ala ai ona tuai ona fai le tatou lockdown lea, po o se faiga faavae foi a le tatou faigamalo o lo o tulai mai nei, pe 3 pe 4 aso ona faatoa fai lea o se lockdown.

Ma le agaga faaaloalo.

**FOFOGA FETALAI:** Ia, o le mea sili ona taua faafetai o lea ua manino lau saunoaga le sui usufono mamalu, ona e fai foi o le faalele, a o lo o matau le atunuu ma le Maota. E ao lava ona faamanino tatou saunoaga ma upu i totonu o le Maota lenei leaga o lea e faafogafoga le atunuu ia aua ne i taitaiseseina i a tatou upu.

O lea la ua manino le saunoaga a le Minisita, e le o i ai se tulaga faapena o oo i tua i le mamalu lautele o le atunuu, na o latou lava na malaga mai fafo. Ia lea ua manino lea tulaga lau Afioga i le Minisita.

O lea e matau atu o tau tulai mai lau Afioga i le Sui Taitai.

**Tofa Hon Lauofo Fonotoe Nuafesili Pierre Lauofo:** Faafetai i lau Afioga mo le avanoa. Mo le faasaoina o le toe tulai mai foi o le Afioga i le Minisita, e manatu e lelei le soosoo atu pea o si a matou foi itu. E faafetai i lau Afioga, e matua faamauina lava le faafetai a lenei sui usufono ma lenei itumalo i lau Afioga ma le galuega fita o feagai ma lau Afioga faapea foi le aufaigaluega, ma le tatou Komiti Faapitoa o le NEOC, ia o lea lava ua faafofoga le Maota ma Samoa e te le o pupuni se olo pe... i le tulaga pe ati foi se pa i le tulaga ua tulai mai.

Ae o lea lava ua faamauina ua agiga foi i le ea, ua saunoa foi le Taitai o lenei Itu, sa faapena foi ona avatu ai se manatu i lena vaiaso ua tuanai, i le tulaga lava lea o le galulue faatasi ma le tutu faatasi i taimi faapenei, aua e le faigofie, e tofua lava le tagata ma lana mea e fai, puipui ia ma lona aiga ma

si ana fanau pe a faapea e sau i tua le siama e pei ona feaveai i luga o upega tafailagi.

O le tulaga lea e tulai atu ai ma le faaaloalo lau Afioga, ona e pei e manaia lava foi le matou tuualalo le vave mai pea o tatou faaaliga i le tulaga lea ina ia nofo malamalama pea le atunuu.

Ua mafua ona ou taua le vaega lea ma ou toe tulai atu ai lau Afioga, ona o lea ou te tilotilo atu i le faaaliga a le WHO, le World Health Organisation, ia o le Faalapotopotoga lea a le Soifua Maloloina o le lalolagi, o lea e aumai ai latou table foi ia o atunuu uma lava o le Pasefika lea e i ai tagata aafia. O lea la ou te vaai atu o lea e aumai ai le numera o tatou e 32 cases. O le mafuaaga lena o le avatu foi o se manatu, afai e le sao, lona uiga e tataua ona faasao leaga o lea e alu i le lalolagi faamaumauga ia a le WHO, a o lea foi e i ai le latou ofisa i Samoa nei. E tataua lava la ona silasila i mea faapea, aua o au ia, ou te le talitonu i mea ia e faasalalau solo i luga o telefoni ma facebook ma mea faapena, e faatalitali lava i le official press release mai le tatou Malo aua o i ina e maua ai le mea sao ma le amiotonu.

E pei o le tulaga lena na ou taua ai lea vaega, ae pei o le mafuaaga lena lau Afioga, ona o luga i le isi pitonuu lea i uta, o lea foi sa taua ni alii se toalua na o ese mai le nofoaga foi lea faanofoesea, pe faamaonia lea tulaga. Afai e faamaonia, ia se i silasila ane lau Afioga ma le tatou Komiti, aemaise lava vaega foi ia o sikulati lea e vaia nofoaga faapenei, ina ia aua ne i toe sao mai tua tagata faapea i le taimi o la e faanofoesea. Aua o le tulaga lea o lea foi e feaveai solo i luga o facebook tulaga ia.

Ae faafetai o lea ua saunoa manino lau Afioga i le mea lea sa laga atu e le sui usufono lea mai Safata, fai mai o la e ua i tua ua i ai le community transmission o lea ua salalau i tua. Faafetai. O le mea la lea e manaomia ai taimi faapenei, o le aumai o saunoaga ina ia silafia e le atunuu, a o lea foi ua taoto i i lau saunoaga ma lau apoapoaiga i le atunuu, e aua le talitonu fua i ia mau tala e feaveai solo i luga o facebook ma luga o le social media, ae faatali pea i se faaaliga mai le Malo, o i ina le faaaliga sao tatou te agai i ai. Ae na pau lava lena o le tuualalo, ina ia faapena ona regular nai a tatou faaaliga mo le silafia, ma le tele o nei mau tala feaveai.

**FOFOGA FETALAI:** Malo faafetai. Ia, ou te iloa o lea ua... ia lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Malo faafetai i lau Afioga i le Sui Taitai o le Itu Agai, malo faafetai. O la e foi e faafogafoga mai le Afioga i le Taitai le Afioga ia Tuilaepa, o le taua ia o lau fautuaga. O lea foi e faamaumau uma lava fautuaga i tulaga e pei ona i ai. Faafetai mo le fautuaga a lau Afioga. I lou lava talitonuga lau Afioga aemaise foi le mamalu o lenei Maota, o le faaaliga sao lava ma le mautu, ia, e faaleo e le Malo. I le taimi nei ou te tau atu po o

le a le lipoti lea e aumai, na pau lava lo matou talitonuga lea e i ai i le taofiga, aemaise foi sa tapa fomai, e 30 lava le tatou numera. O na tulaga uma, e le i alu atu foi se faaaliga a le Malo i na fuafuaga.

O le taua o le umi na faatali lau Afioga i le sui usufono mamalu, e ese foi aga a le matou foi Palemia, o se tagata e toafilemu lona finagalo ma le tofa. E aoao uma mai lava faamatalaga aemaise foi matou te fono lava ma le NEOC, e le faia i so matou talitonuga, o latou o lo o vailiilia mea uma aemaise tulaga. O le fautuaga foi a le Komiti o Faalavelave Faafuasei o lo o faauluulu i ai le Palemia aemaise foi nisi o Matagaluega i CEOs, e alu ai le tatou galuega.

O le ala lea lau Afioga i le Fofoga Fetalai o le taua ia aemaise le tele o fautuaga, ia o mea taua ia. Ia taoto mai laia o tulaga e pei ona i ai.

Ia o nisi o vaega sa laga pei ona ou fai atu, o le a ou le auiliilia, o lo o ua tamau, aemaise foi nisi o... o le talitonuga i le taimi lenei, ua tataua ona agai loa le Malo ma le Matagaluega i tatou falemai foi ia i tua ia faamautu aemaise centres pei foi ona tatalo mai Sagaga 2, o Siumu, o le tele o nisi o itumalo sa faafetai mai aemaise foi nisi, aemaise Lefaga ma Faleaseela, o Falelatai ma Saanapu, o lo o i ai fuafuaga pei ona pasia i le paketi talu ai ina ia fausia. O le taua, aua ua tilotilo le tatou Malo, a oo nei ina fai zone le polokalame lea sa taoto mai a le NEOC, e tataua ona i ai se falemai e tua i ai tagata, e tataua ona i ai ni mea talatupe, ni banks po o ni mea faapena, e tataua ona i ai se petrol station. A oo loa i le taimi e tataua ona loka ai tagata i totonu o le zone, e le tataua ona toe feoi atu i isi mea, a ia maua uma lava mea i totonu o le zone lea. Ou te iloa la, o lea o le a silasila i ai ma ua toe fautuaina le NEOC ia silasila i vaega foi ia e i ai falemai ua uma ona fausia, aemaise foi tulaga e pei ona i ai mea faapena uma ia mafai ona tua i ai le...

E pei lava ona ou fai atu, e le i faua Roma i se aso se tasi, a ua tatou i ai i le vaiata o le tatou galuega tatou te galulue faatasi. Ia, o mea uma lava, e le mafai, le mafai e se poto ona fausia vagana le tatou galuega.

**FOFOGA FETALAI:** Ia, e faamalie atu i lau Afioga i le Minisita ona o la e tulai mai le sui usufono mo Sagaga. Na e lauga lau Afioga i le sui usufono mo Sagaga 1 i le falemai?

**Susuga Maulolo Tavita Amosa:** Lau Afioga o lea lava, o la e taua mai le matou falemai.

**FOFOGA FETALAI:** Ia, saunoa lau Afioga i le sui usufono mamalu.

**Susuga Maulolo Tavita Amosa:** Faafetai mo le avanoa lau Afioga i le Fofoga Fetalai. Sa tau fetuunai malie muniao i se lagona, i se vaipanoa e faaofi malie atu ai se lagona, ona ua ootutu lava ma loloto lau folasaga i le amataga o lau mataupu. Faamalo fai o le faiva.



Ae le i oo la sau faamatalaga i tulaga i lau folasaga matagofie ma le faamomoiloto, pau lava le mea lea sa tatalo atu ai, ua ou le toe tuliaupuina le tulaga i le ta PEN faa-Samoa foi lea e aumai, leaga sa lavea i lau lauga faalauaitetele i le ao, ae o le po maua e ua lavevea i le faamai. O le ala foi la lea ua fetuunai malie ai, e talitonu ua le toe faigofie le faasoaso a le aufaigaluega, ona o lea ua tulai mai tulaga ia. Ua faapena foi ona ou augata e toe tuliaupuina lea tulaga, ae ua lafo atu lava le faatuatua.

Na pau lava o le mea lea, ua manaia lava le amata mai o le tali a lau Afioga i se tasi o vaega sa ou laga i lau lauga faalauaitetele. A faapea o lea ua maua se isi i le Koviti-19 i Sagaga 2, e mafai lava e lau Matagaluega ona faamaioio lelei mai laasaga muamua, o le a le mea e muamua ona fai? O fea e ave i ai le mai? E ave i le falemai i Leulumoega pe avatu i o?

O le laasaga lua, o la e faafofoga mai lou itumalo, o la e faatali mai le pule mamalu a alii ma faipule po o fea se mea matou te fesoasoani atu ai. Aua e moni lelei saunoaga a lau Afioga, e faapea foi le taimua mai a le Afioga i le Palemia. O le mataupu lenei, e le faailoga tagata le faamai ma e manaomia le tatou tutu faatasi.

Na pau lava lena o le mea o lea e tau fia avatu le talosaga pe mafai lava ona faamanino lelei mai i luga o televise, ia ona fono foi lea o alii ma faipule o le matou itumalo, a mea la lea ua faapea mai le Matagaluega o Falemai tatou nofo tapena i ai. E lelei lava le puipuia i lo le togafitia, aemaise o lea tatou te nofo taumate, po ua i tua i afioaga le faamai pe leai. Ae faafetai tele lava.

O lona lua, faafetai i le saunoaga vaeane foi paia ma mamalu o le itumalo o lena e te ee mai ai, ia e silafia uma e Samoa, leaga o oulua ma le Minisita o Faatoaga, e 2 a upu lea e i ai, o Tama e Vaaiti toe Vaaimalae, ioe, vaaimamao, onosai, o a faitioga ua fai mai, o lena. O le a le umi sau upu ou te tali atu ai i lea tulaga, ou te ava i le va nonofo ma le au Ulutaia, aemaise o le Sui Taitai o le matou Vaega. Na pau lava lea, ia lototele e te lagona lava le suamalie ma le matagofie pe a maea e leai ma se faamai e aafia ai Samoa ma se isi e maliu. Ia manuia le tatou Fono.

**FOFOGA FETALAI:** Malo faafetai.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, e fia faasaoina le avanoa o le Afioga i le Minisita.

**FOFOGA FETALAI:** Mo le faasaoina o le taimi o lau Afioga, se i tulai mai le sui usufono mo Vaimauga 1.

**Afioga Sulamanaia Fetaiai Tauiliili Tuivasa:** Masalo e matau atu o le a see ese le sa o le Afioga i le Minisita. Na o le pau lava lenei o le Minisita foi sa fia faalogo lava i sona finagalo, e le gata i lenei sui usufono, ae o le tapuaiga foi a Samoa po o fea ua oo i ai le faamai lea ua i totonu o le tatou

atunuu. E momoli le agaga faafetai i lau Afioga, malo le toa. E faamanatu foi i lau Afioga i le Minisita, o tamalii ia e taulamua i lau Matagaluega, o Samau, o tama o le Vaimauga, ma Agafili, o matai o lou itumalo.

Ae o le tulaga sa ou tuualalo atu ai, o le tulaga foi lea i le vili mai o nai tagata pe a toe tatala avanoa e omai ai, lea e faanofo vaavaaia ai i se tulaga i se... aua o lea o le a tuu faapea e pay lava e le tagata ia lana ia sau, e pei o le agaga lena.

O le isi tuualalo, e le o po se lilo o le tagata lava ia e le o pipii i le Atua o la e popole, a o tatou, so o se taimi lava. Ia pe tatalo atu ai, a faapea ua sau le tui lona tolu, o le a le mea e le amatamea ai tatou, tatui loa tatou nei o le Palemene ma tatou o taitai o le atunuu.

Ma le isi foi tuualalo i lau Afioga i le Minisita o nai tamaiti laiti aua o lea e i ai le tatou tulaga foi lea i le tui lea na alu, ae pei na o le 12 ea i luga. Ae tuuina atu le tuualalo, pe le mafai ona tui le 12 e oo lava i lalo ona o le manumanuga lena. Taatia ia nai o tatou tuua matutua ona e i ai popolega o le tui e le o gafatia. A o nai alo ma fanau ia e tuputupu ae, ia e pei e faapena se agaga. Ae momoli lava le agaga faafetai o lenei itumalo i lau Afioga. Ina ua uma le lauga a le Vaimauga i le Aso Faraile, ia o le aso lava lea na faalauiloa ai ma tatalo ai lenei sui usufono i le Atua aua ne i i ai e isi e oti, a lea e oo mai lava i le taimi lenei e leai se isi. Ae o lau ia tatalo ia lototele lau Afioga i le Minisita. O tatou foi o Taitai, pei ona saunoa foi le Taitai ma le Palemia, o le mea lenei o le faamai e leai lava nisi e faatuiese ai, tatou tutu faatasi. E leai se isi faapea e sau ona faapea lea, ia, alu muamua lava le FAST, ae tuu le HRPP. E leai, e sau lava le faamai e tutusa uma.

A o le tuualalo a lenei sui usufono i le tatou faigamalo, ia, o ou mama na lau Afioga i le Minisita. Ia lototele. O le tulaga o i ai le faamai, ma ia tatalo foi lenei sui usufono, ia a mafai ona toe fai se isi anapogi. Na pau lava le ki o nei mea uma, o le tatou toe tulivae i luma o le Atua ma tatou o atu i luma o le Atua. Lau Afioga i le Fofoga Fetalai, o sina tuualalo lena i lau Afioga i le Minisita, ia lototele, o le tulaga ua i ai le faamai. E tatalo foi lenei sui usufono, a mafai ona toe fai se isi anapogi, e pau lava le ki o nei mea uma, o le tatou tulivae i luma o le Atua ma tatou o atu i luma o le Atua.

Lau Afioga i le Fofoga Fetalai, o se tuualalo lena i le Afioga i le Minisita o Soifua Maloloina.

**FOFOGA FETALAI:** Saunoa lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** E masalo e le o toe umi o le a faauma atu, e pei lava ona ou fai atu, na ala ona ou tu se i fai se upu i le mea lea e vavao ai Samoa, o le ala lea o le taumafai atu. A o manatu uma lava o outou e ala i le Tala o le Tupe, o lena ua outou silasila. O si au uo foi i Fagaloa, o lena ua avatu le tali, aua e te popole. A e silasila mai i lou limatusi lea e tusi atu ia oe, ona e talitonu

lea, aua e te popole. O lea ua uma ona ou oo e asiasi, ua ou vaai na fausia le falemai, ae le o faaaogaina. O lo o taumafai foi ma le CEO po o le a le faiga. E pei o le agaga lena.

Lau afioga i le Fofoga Fetalai, e ese le taua o manaoga, taua saunoaga, e le faatauagavale. E pei ona ou fai atu, na ou nofo lelei ma tusitusi i lalo, e 25 i le taitai o le Itu Agai lea sa manino fautuaga aemaise lo outou mamalu. A fai la e le i oo atu ai sau tala, ona ou faapea lea, e silafia e le Atua mea uma.

Ona ou faapea lea, le Matagaluega o le Soifua Maloloina ma Vaega uma, le CEO, la outou galuega faigata i le ao ma le po, sautia, laina. O la e sisila le Atua. O lea foi ou te tatalo i le Kapeneta ma le Palemene e pei ona i ai Fonotaga i le tele o taimi. Ia silasila totoa i risk allowance aemaise o nisi vaega faapena ina ia mafai ona tuuina atu i se taimi. O le agaga lena o lo o taumafai pea. Ma e le vale se tau i o na mea. O outou mama na, leaga o le NEOC o lo o fausia i le toatele o CEOs aemaise foi o Ofisa Sili o Pulega o Matagaluega ma Pulega Tumaoti a le Malo. Ua malo faafetai, e le faigofie. E pei ona ou fai atu, e le mafai e se isi o matou ona alu atu e tu, e faafeagai ma le oti, a o outou o lea lava. O le ala lea o lou faafetai atu i vaega uma.

Ou te asuasua foi malu i puega lau afioga i le Fofoga Fetalai ma lenei Maota, o a ni aleu o lenei Matagaluega, o a foi ni faaletonu o le aufaigaluega. Ia o faaletonu lava na o le Minisita. Ia aumai i lagi ia manu, ia maua le tofa i lau Afioga, e faafoe ai faigata ma amio le pulea o nisi o sui usufono. Ae matou te talitonu o lo o vaatele i lau afioga.

O le ala lea, lau afioga e aemaise Samoa ia aua lava ne i outou popole. Ia toa le tai, o lo o manuia mea uma, o lo o i ai le talitonuga e leai lava ni mea e faaletonu. Ia tatou tuu i le Atua mea uma.

Ona faauma lea o lau tala, o lo o faafofoga si ou itumalo, e le tau fai atu, e le tau faalagia le itumalo, ua outou faafofoga mai i le leo o Valasi. O le leo lena mo Samoa, sa outou filifilia mo le Maota, e le toe tau selu atu. I la outou tapuaiga, faafetai tele, e lagona le malosia o le tino o la outou sui. Ou te talitonu i le mafanafana o a outou tatalo. O le toatele o nisi o outou na aumai feau ma faamanuia, ma faamaisega i tulaga e mafatia ai ma faaletonu, faafetai i la outou tatalo. E le galo la outou tapuaiga.

I atunuu i fafo i la outou faafofoga mai, ia nisi o outou o lo o fai ni tala sese, faamolemole o le Maota lenei o Samoa e vete ai upu ma faasoa ai le tamaoiga o le atunuu. Aemaise o lo o galulue i le ao ma le po e puipui le soifua maloloina o Samoa.

Lau Afioga i le Fofoga Fetalai, ia maua pea e le tama matua ia Tea, le o lagolagosua ia te au nei, o le toeaina matua e aumaia le tuualalo. E ui lava ina tele ina nofo i Salafai ae vili mai lava, Valasi ia manuia ou faiva, aemaise le CEO ma matou uma.

Ia manuia Ofisa Sili o Pulega o Matagaluega, aemaise le tulaga i fatugao. Aua e tasi lea matautia, o ai lava o outou o le Palemene o taumafai e siaki ia mea, ia vave faafesootai mai. O lea foi e toalua sui usufono o i ina lea na

faafesootai mai au, e fia ave i fafo, e so o se mea e mafai ona saina e Valasi le pepa e ave ai le tagata. Ia aua la ne i pei e ula ia Valasi, aua e maua lava i o i le Ofisa. Ia manuia Samoa.

**FOFOGA FETALAI:** Ua faamalo faafetai saunoa i lau Afioga i le Minisita o le Soifua Maloloina, aemaise o le Faalapotopotoga o Fatugao, aemaise foi le Iunivesite. Ia malo faafetai saunoa faatama o le atunuu. I lou tulai mai ma le faatuatuaga o le Palemia, ia malo. O lea ua faafofoga ma le toto o le paia o le Maota aemaise o le atunuu. Aemaise o lenei vaitau o lo o vaeseuga le saua o lenei faamai, ae peitai ua avea lau saunoaga manino i totonu o le Maota lenei, o lea ua maua ai le toamalie ma le toafilemu o le Maota ma le atunuu. Ia malo galue i lau Afioga i le Minisita aemaise foi o le Ofisa Sili o le Pulega o le Matagaluega ma foma'i ma i latou uma o lo o galulue, malo le galulue, aemaise foi o le tatou Komiti o le NEOC, o outou mama na, faamanuia atu foi le Palemene ia outou galuega fai. Aemaise ia maua pea lo outou malosi faafouina, aua lava tiute ma faiva ma galuega ua tofofi ai outou aua le puipuiga o lenei faamai. O le mea lea, malo faafetai.

O lea ua matau atu, ua lata le tatou taimi malolo, ou te talitonu foi o lea ua oo atu le faasologa i le Minisita o Leoleo ma Falepuipui, e talitonu o le a maua le avanoa pe a tatou taliu mai i le 2:00. E tasi le itula lea e malolo ai e pei o le lafo na faatu e le Palemia, tatou te toe feiloai i le 2:00 ia ma faaauau ai le tatou galuega.

O le a faataatiaese Taulumaga a le Fono Aoao Faitulafono mo le malologa e tasi le itula, tatou toe feiloai mai le 2:00. O le faaaliga taua lea e fia tuuina atu, o lea ua tapena le tatou taligasua aua le aoauli, ona e puupuu le tatou taimi malolo. O le mea lea, ia faataatiaese a tatou galuega.

*Na faataatiaese Taulumaga a le Fono Aoao Faitulafono i le itula e 12:55 i le aoauli, ma toe faaauau i le itula e 2:00 i le afiafi.*